



明齋先生集一

詩 辭 賦

卷之六

~ 16
2376
2



和
號 2376
卷 26-2

明齋先生遺稿卷之一

明齋

辭賦

以蟲鳴秋賦

無名子方夜獨坐于時秋也素月揚輝白露下庭玉
宇寥廓萬籟收聲聲在草間唧唧啾啾如咽如吟如
訴其憂無名子異之曰此非蟲聲乎肖翹端奕蠢然
無知爾有何冤而鳴其悲豈天使之宣其不平爾乘
其機不能自停噫夫秋之爲物也其氣肅殺其意慘
惻卉悽其腓木怨其落人最有情其感百轍歎老嗟
卑傷離悼別故草木之悲鳴於風人之悲鳴於言雖

所鳴之有異諒所感之同然彼眞辛之無爲順四時
而成功有底事之難平而假鳴於微蟲當寒宵而競
起若悲歌之相酬從初夜而薄晨曾不得乎少休鳴
呼噫嘻我知之矣自乾遇吳陽消陰長馴至于否小
來大往和風一散邪沴相撞天地交閉不能升降是
以夷狄亂華而中國滅人慾橫流而天理微豺狼縱
橫而麟鳳逝芝蘭萎絕而荆棘滋善不必祥惡不必
殃清明消短濁駁蕃昌天老且耄理弱氣強一任其
爲莫可主張天心孔悲怛然內疚顧其載之無聲雖
壹鬱其誰語乃眷下臨誰代予言嗜慾之者天機濇

莫如爾之爲蟲爰賦爾響爰牖爾衷予以鳴之于夜
之中無名子於是出跪于庭涕泗流地稽首北辰敷
衽陳志陽雖甚微碩果不食氣雖甚肆理無不克耑
地中之有雷雖錮閉而莫遏奮一聲於天衢見羣陰
之破裂魍魅遁藏惡穢迸絕滌我乾坤懸我日月幹
然轉之其機在上帝赫斯怒孰不從令躋斯世於春
臺布惠澤以旁達凡含生而受氣舉欣欣而和悅是
特帝之餘事天胡爲而不豫反區區於蟲聲類苦吟
之東野言未畢辭斗柄回指諸蟲悉瘖不知其處

次歸去來辭

并序

余以屏螫微命分甘溝壑而置身表襮猥竊
虛名表裏慙恐措躬無所偶以妄言得罪當
世晦翁所謂自近事言之則爲廢斥自初心
言之則爲爰得我所者正爲余今日道也蓋
余今日之事有二幸焉虛名上欺攬取兩
朝恩禮節次超躡無有脫免之路矣倘微尤
翁與文谷老峯二相之餉我將何以收殺此
虛名耶雖仰孤 國恩負心忠孝而自此庶
得以無所怵迫安意待盡此一幸也自少師
事尤翁而彼此情阻亦久矣心口牴牾吞吐

不得方不知處義之道矣忽至此境更無餘
地雖靜念平生自悼不幸而自此亦得以自
守拙法無復艱脆於方寸此又一幸也晦翁
又有言曰天下之事必至於久而後是非之
實可見此君子之立言制行所以不屑一時
之毀譽而唯欲其無所媿悔於吾心也余謂
苟於心無所媿悔則一時之毀譽固不足道
不見是於久後亦何慊焉丙寅人日無客獨
坐偶讀市南先生次陶辭韻慨然有感遂援
筆而賦之

歸去來兮昔固未出今何歸本不求全於性命撫身
世而自悲際 聖作而賢蔚咸吐氣而力追思鉛割
之各效恥坐枯之為非冀公私之一洗時廢食而忘
衣奈天運之蹶戾悼精衛之誠微人生荏苒歲月流
奔三年血泣廿載衡門鬢毛遽變素心獨存逝為溝
斷不願犧樽尚虛名之纏繞恆慄懷而赧顏矧 隆
恩之日加詎微忱之敢安才無堪於應 命義不敢
乎閉關方進退之路窮見笑譏於聽觀忽天幸之有
隕欣賤分之得還何世人之好事強比擬於魏桓於余
癸亥承 召之日與友人有略論時事 歸去來兮又
者而人謂余之不出有三事也故云

何事乎交遊曩余志之不量謂聖域焉可求爰尋師

而就正惟道悠之是憂一朝反省而自疑乃顧慙乎

朋疇認鐵作金無楫操舟愍胎疾之難醫胎疾者胎氣質之病

難變見 語類羞詭遇之若丘既同行而異情寧異源而同

流知不可乎苟合悵太息而歸休已矣乎人心晦塞

明有時久矣猶豫而遲留胡為乎終身迷所之既往

縱難咎方來猶可期服前人之遺訓循本業於耕耘

雖年邁而氣類尚春禮而冬詩俛日孜而斃己庶質

晦翁而無疑

詩

咏蛛網

幼時作。下一首同。

蜘蛛結網罟橫截下與上為我語蜻蜓慎勿簷前向

月夜

裸體窓間卧偃蹇明月下超然忘世紛我是何為者

獨坐

丙戌

暝鳥投巢急寒雪滿壑空窓太愁寂搔首費孤吟

寄朴兄叔厚

世屋

天地日月白江湖秋正杪丹霄鴈響斷碧樹霜風攪
濯足望美人長歌倚孤棹

客南

丁亥

雪光和月白泉響受風多欹枕難成睡閑愁不奈何

有感二首

懦緩吾常病營為事轉拙二者不奈何居然無用物
自知無用物宜教閑處着萬事已灰心隨身一服藥

交河道中

落日故山道秋風遊子衣人間問何世長往欲無歸

謝外舅

一言垂至教再拜謝深仁不以昏蒙甚申之道理真
工夫雖在己啓迪實須人媿我材樗櫟煩公作梓輪

感懷

每恨作人愚下最淡慙為孝始終虧脚非豎定將何
立見未分明不免疑更覺發言言近妄要須經事事
方知中宵感慨推衾坐空使無從淚滿衣

感懷

己丑

可媿當時事令人心惕然要須究竟此不合太因循

敬次退陶先生古鏡韻

我有一塵鏡內含天然光慙慙陶山叟為述重磨方
不繫年老少何論力弱強苟能勉修治特達如圭璋

宿梅坪

彩菊秋霜晚方塘夕日低懷人徙倚久暝色入寒齋

宛亭路中

雪上加霜霜上風強鞭羸馬入山中石間細路千回
曲林外新暉冷淡紅

偶得

庚寅

山萬殊而一本水殊塗而同歸覽流峙之定形喟造
化之玄機

悼美中

再從弟試二一首

萬物浮沉一氣虛雲生冰解有還無來時妙合歸時
散釋魂凝形未始殊

天地本來饒合散壽夭何事謾悲娛重吟落日歸雲

句浩劫長留馬鬣孤

庚寅四月市南俞先生以 恩譴北征出送于

利仁驛路以二律奉別

聖量恢恢天地大孤忠炳炳鬼神知君明臣直稱前
史慕古生今奈此時順一途三元有數修身俟命夏
何疑浮雲蔽日關山遠不獨私情恨別離

絕塞迢迢地一涯那堪此夕路臨歧世方喪亂賢人
遠身歷艱危學力知降任增能天有意覆盆回照日
無私長沙未久應 前席髭髮分明勝昔時

自訟

悔吝如山積明剛未易期身心轉憔悴撐拄幾多時

次聘君見示韻六首

行之欲篤學要精只為誠身豈為名最怕此心難固
守柔愚終未進剛明

木從根本水從源賢聖千言只一言喫緊為人堪味
處人心操舍即存

珍重三章成物意敢將言語視等閑路逕面前方狹
窄願從開豁免辛艱

學貴精之又致精笑他徇利與徇名聖賢啓牖羣蒙
意萬語千言儘分明

學無誠似水無源心地空空浪騁言夢死醉生同泯
泯誰知萬理此俱存
氣質拘之人慾涵光陰荏苒事偷閑未分人鬼關頭
路欲效言懷着語艱

咏殘菊

憔悴窓前菊經霜一朵花清香空歲暮貞趣獨天涯
白日輝光薄青春惠澤賒幽人凝佇久歎息若為嗟
庚至幾望日氣凜冽忽憶遠人恨余不送夜起

彷徨詠以記之

時趙浦渚去位
餘市南遠謫

北風寒正苦豈是遠行時九重淡如海孤臣命若

絲孝乎稱繼志王者貴無私世乏回天力空增賤
士悲

辛卯立春二首

沍寒之極有陽春天地重開日月新直待韶光滿海
岱會須身作祝堯人
家用平康貧不害心無慕累樂奚疑贏得新年好清
福未妨瓮牖揭春詞

和聘君韻

辛卯

滔滔天下水東流治亂相乘未暫畱稷下高風曾蹈
海荆南羈思舊登樓姓名遮莫求人識身世端宜擇

地幽仰看蒼蒼天欲定羯奴能久溷神州

散步溪上遇雨憇巖下

暫因緩步來溪上正值山雲帶雨過巖下恰容雙膝
住支頤坐看水添波

哭叔厚兄三首

悠悠子之逝已而長已而才高壽何促德完命何虧
峻潔精神勁真醇意思卑冲襟厭僂儂直性惡詭隨
待人削邊幅存心常坦夷恥作淺丈夫欲爲眞男兒
慨然志斯學激昂前賢思潛心聖賢書愛看淵明詩
脩程始發軔長夜遽掩輝天道諒難諶人生那可期

倘俾永厥齡所造不可知有志不克伸君子應悲之

又

昔子始來我年纔十六時門闌慶佳婿師友稱英姿
而我甚卑下屢被高明嗤猶憐性愚拙不喜世澆漓
欣然臭味同談笑傾心脾蓬麻我所願玉石君所資
霞山有泉齋三歲共書帷糲飯或不飽菜根聊充飢
貧賤固士常動忍眞吾師每別輒戚戚相會便怡怡
願言永無違歲暮同棲遲孰謂漢中別遂作生死離
音容永冥漠書劍空淒其他生未可卜此生無會期
切切復切切誰知我心悲

又

姊年始十歲兩弟九六時遭天降禍酷失母餘三兒
提挈慈父側偏貽鞠我罹尚幸免夭折家室無愆期
兄才又秀茂一家悲喜滋靜好琴瑟御百年今十暮
奈何倏然去棄之如相遺既無身後嗣使姊將誰依
送形故山南奉主歸于尼哀哀隻容苦惻惻雙淚垂
上重庭闈憂下淡骨肉悲薄命乃如許行路猶嗟咨
天地此恨長死者知不知

春菊

并小序

余去冬詠殘菊既而嫌其太孤苦適看雨中

叢菊甚茂生意鬱然余詠前作而感之遂賦
以和之云

亭亭籬下菊春日數叢枝氣象雨中見精神霜後知
肯為妍媚態憐有老蒼姿世乏陶元亮誰為鍾子期

和聘君二首

偶然題壁有云云非把閑忙苦要分祇是分緣隨遇
異元來義理到頭存浮思叵耐無時動善誘淡知用
意勤畢竟亾羊誠可怕戒言還媿又多言

為學聞如逆水舟登難退易使人憂筋骸縱弛成頹
惰言行輕浮足悔尤操處規模常促促放時思慮太

悠悠工夫似此何能進瞻彼青天日月流

塵世奔忙何害事青山靜逸也多分有道奇才忙
亦得戀君誠意逸仍存人情造次尋常徇天意分
明只麼勤誰謂偷閑猶可說矧伊耽樂更堪言
心似波瀾載覆舟箇中須喜也須憂自慙踈拙徒
然悔無改顛狂可奈九天不容私年數迫道之云
遠我心悠饒君高眼輸先手誰學渠儂老下流

聘君次

思歸

濡滯山中久羈懷日夜淡愁來步庭畔缺月在踈林

自歎

尤悔尋常叵耐多默慙非必被人訶乍萌慾處心先
暗纔覺差時事已過量狹未能隨物應見遲無可奈
吾何柔愚終有剛明理尚恃前賢不我訖

和呈市南氈城配所

迢遞音書滯一方那堪貽阻劇參商遙知戀 闕丹
心苦更想憂時白髮長困處不忘增益義達來能得
設施當佇看漢帝思前席何必齊臣怨落霜

次韻呈市南氈城配所

智者隨時能處義仁人無懼則何悲男兒責任元來

重君子工夫這裏知玩理高明真蕩蕩忘情榮辱亦

規規關山悵望三千里落日浮雲亂我思忘情榮辱謂不能忘

情而強要忘之韓退之蘓子瞻之類是已

敬次家君韻詠後村荷花

左梧仍右竹長對愛蓮人白日天香發清宵露色新

乾坤秋未老風月興無貧願絕喧煩累於焉托此身

辛卯十月陪家君掃長久洞入寒泉遂會諸叔

父諸兄弟同宿于墳庵翌朝行宗會禮既醉以

花發多風雨人生足別離分韻賦詩得生字二

首

不須悲亂世不足歎浮生好會未易得此宵良有情

幸茲松楸地桑梓是魯城欣然見顏色隨分持壺觥

飲酒浹洽止論文今古傾山中夜欲闌月出林壑明

歎息忽彌襟明朝將送行

聚散有數在悲歡緣境生不耐離索懷况又送別情

日下望長安天末憶邊城共此百季心難傳千里觥

開懷且晤語斟酒莫辭傾林風向人吹松月入窓明

此會可無記聊作短歌行時仲父在京口季父蒞萊府故第三句及之

翌日又疊十韻長詩

世無萬年人樹無千日花花落不足惜人生良可嗟

所以古人心見此偏感發類弁辭既戚山樞情亦怛
好會不厭頻美酒不厭多暇日正堪遊不飲將奈何
因之講親親庶無墜遺風油然孝悌心莞爾談笑融
禮教自極天仁心存化雨苟於此理明免俾斯倫敦
哀哉俗日薄此道幾長湮物我利慾間骨肉如路人
甘被角弓刺罔念常棣情不有吾世德誰能覺後生
秩秩倫理正愉愉恩愛篤從今益自勉在昔非不足
豈不裕後垂抑亦光前烈法家四方觀親炙他人別
願言學同居歌聚恆於斯終身有相樂永世無相離
十月廿八日攜元禮再從弟楷輩棲于淨水庵度叔

兄 違期不至詩以促之

纔入山門百慮灰凭窓南望萬峯堆美人不到林光
暮滿壑平烟宿鳥迴

酬俞胤甫 命胤 二首

雷雨若降先生庶幾有 賜環之命故篇末
皆致意云 壬辰

別時容易會時難矯首懷人白日闌力去烏頭師義
識書來鴈足友情看小窓寂寂吾如蟄脩路漫漫子
在鞍丈席掘衣淡有計幾辰重續舊團欒
由來行路棘如難悵悵山陰興已闌素札今朝江外

至青眸昨夜夢中看停雲八望時拈筆遠樹含情欲
理鞍早晚湖山春意足不妨蕭寺與團欒

敬次龍西叔父韻奉呈市南文丈魯陵配所二
首

一片仙區萬古存桃花流水不知源若非偏荷君
恩重安得生涯到谷門

天地悠悠一草廬此身閑處即安居遙知靜後皆春
意欹枕晴窓玩六虛

寄恕弟兼呈南麓諸從

山中晝寂寥子規啼青松獨對案上書永夕無人蹤

未見賞心者誰與踈煩曾念彼漢上客清會方從容
朝期藝苑遊暮約南城逢願言往見之雲樹何重重
起來撫庭栢注目看西峯已矣人異影安得長相從

遊廬山行 並小序

廬山即錦山安城縣德裕山之別名也土山
甚巨雄於湖嶺間余遊三日山之表裏殆遍
迹焉歸而記之以成此篇要作異日之面目
云爾時玄徐首夏之下日也

平生寒癯厭塵土泉石膏肱天與疾年來岑寂抱離
憂願遊方外襟曾豁強策蹇驢欲何之聞道廬山最

奇絕尋尋峽路抵山下山下人居山外別芒鞋竹杖
理行裝舉目不禁清興逸一逕緣溪百回渡始得小
庵依林樾山僧迎我坐蒲團白飯清泉香爨粥雙排
碧櫳倚樓柱絳雲在霄山含日平明起問白蓮社不
惜晨嵐濕布襪石磴崎嶇木棧危飛錫引我逾超忽
圓寂遺基在山北古木僵立叢篁密南庵蕪没人蹤
斷北庵無僧但有佛凌巒越岡二十里九千洞裏迷
樓闕緇流誦經百為羣澗水松葉充飢渴可憐一旨
引眾旨辛苦相隨墮幽窟有山人戒珠者年八十餘聚徒授經沙彌進
茶潤我喉色如櫻桃和以蜜清新不減瓊玉膏飲之

令人勞火滅崢嶸更指冢頂路為眼不計雙脛茶褰
衣直上仰脇息十步回頭五步歇溪山不見雜木林
老檜蒼栢參天鬱五味胃塗香襲人此地元無蘿與
葛山腰廢寺號香積輪奐委地空摧折香爐峯上日
將午劃然前臨眼界闊左揖伽椰右菴嶽頭流橫互
天南末蒼然盡入一望中無數峯巒似蟻垤韓公或
若極費力猶恐形容未能悉時方孟夏草木長山上
猶留二月節洞口纔見躑躅殘峯頭正好鵲花發僧
言五月葉始敷七月飛霜九月雪由來樹木不敢長
短榦朽枝相縈屈高倚危巖望四極森森萬境咸羅

列曾聞尼父小天下見到方知真快活同行諸公揖
我笑指我健步相怡悅逶迤下至白雲墟歷覽從容
流憇畢俯視西溟天際白烟霧茫茫不可越山雲欲
雨日將夕却嫌歸意還恩卒須臾下盡萬仞壑咫尺
仙區向來失仰面回看經塵地宛然雲中數峯出升
時甚難降時易忽念崩登警戒切夜卧闌干靜頤神
獨恨良宵未見月悠悠世事念已灰羨彼冥棲在巖
穴逃空却與正道異還媿吾心易推奪明朝拂衣下
山門石川隨人流泱泱圓通谷口叟窈窕復有名花
芳酷烈逢僧聽說金剛勝優欲因之向溟渤清冷難

御脰未羽矯首長吁心蘊結男兒遠遊會有時莫教
憧憧戀着一倘然而去浩然歸一笑都忘我與物

過李文書堂有感寄呈沙外新寓

愛茲新築近匡廬終古山居勝野居秋葉春花明戶
牖溪聲嶽色滿庭除苔斑松逕堪攜杖日曷香峯好
展書獨恨美人雲外隔謾凭危石看潛魚

赤裳山城次僧軸韻題永保寺樓柱

古來天設險殘堞迴依山係是關防地雲僧亦不閑

萬松權丈 詠二首

尚書餘慶盛螽斯處士幽貞號白眉兩世潛光能自

樂一生修行恐人知賤貧繹獨窮來命梧月松風靜
裏資六十七季觀化去在公無憾我何悲

蘭生幽谷抱孤芳憔悴翻驚一夜霜莫恨未充君子
佩也能終始葆天香

呈清坐堂

同春所
居堂各

癸巳

蘭室春濃香襲衣一塵無處見天機誰人會取今宵
意羸得吟風弄月歸

寄黃周卿

世楨

宋伯興

奎楨

希張

光祚

靜几明窓世事稀玉人相對澹忘歸翛然捐罷衡門
外月滿晴空露滿衣

為候市南丈向嘉林遇風于石江不得渡而返

二首

山花如錦草如茵好是江湖欲暮春訪友尋師非惡
事怪他風伯苦相噴

可笑吾行每如許出門逢雨又逢風始知造物偏多
事長欲置人圭竇中

和市南丈次唐詩封丘縣韻上仲父童土大人

宜春縣齋

並小序

前冬行李南為之日伏蒙以詩送行之命而
妄意贈言贖別自是朋友箴戒之道非子弟

所宜爲故竟不敢承教仍竊伏念我大人春
秋已高血氣已衰朱墨之勞非所以將養疾
病鞭撻之苦非所以頤適精神馳驅送迎之
擾尤非所以調護筋力私心憂慮實不自己
嘗欲一獻其愚以爲丙舍先壠魯堂家塾優
游卒歲頤人之所也鄉黨慕義宗族服仁教
誨式穀君子之樂也陪奉杖屨聚合骨肉和
樂且湛一家之願也以此之安易彼之危懷
欲陳之而未敢輒適因俞丈之篇又承家君
之命乃敢以區區續步呈上非敢有他腸祇

以仰輸下誠而已梅福多事陶潛不恭則俱
不敢援以爲說率爾僭瀆不勝隕越伏乞一
賜莞爾幸甚

憶昔君子在陳野歎息思魯狂狷者闕里洋洋絃誦
聲詩禮遺風百世下始知棲棲徒爾爲古今未有河
清期東周無夢不須說鳳德之孤奚足悲斐然冠童
二三子攻木撞鍾方在此譽髦斯士望豈弟鳧在天
飛魚在水方丈山下路悠哉一雙鳧鳥何時回欲待
明年池草出几杖迎我先生來

田家遺興四言

積雨初收晴空如拭人閑境幽日八事息單衣木履
緩步庭側郊原水滿村巷烟籠開懷納月褰袂迎風
超吟高想邵老陶翁貧賤無憂富貴非願襟懷所同
千載何遠卒歲優游誰尤誰怨

簡舍弟推四首

敬要整齊收斂得仁從言動視聽求試於日用頻提
省庶少身心大悔尤
得失在天非在我賢愚由己豈由人人惟要貴不要
好戚戚悠悠了此身
惡食弊衣知恥惡忘心失性却恬媮苟將內外權輕

重此箇真如轉戶樞

回首悠悠二十載人生少壯定須臾將十載虛過
了真作人間劣丈夫

八月宗會于後村市南適會命韻二首

朗月清風籊籊花高陽無羨聚星家如何獨被魔兒

戲漫向空窓咏白華

適以病未
叅故及之

天氣初涼菊有花一秋佳會屬吾家還愁南北分離
後兀兀寒齋送歲華

遊雞山鳴鶴道中呼韻

三秋一室閉門淡不覺霜凋錦繡林今日偶然幽興

明齋遺稿卷一
發却嫌山雨在雲心

登湧泉峙

爲愛秋山賞何嫌石路難
厓松根半露林樹葉猶丹
神寺烟光碧龍庵磬響寒
登高方縱目天地望中寬
神都

石在稱宮礎川防號御溝
道僧山記妄齋野夢言浮
聖祖千年地神京漢水洲
我來尋古迹取次作秋遊
福林洞

愛玩心還惱耽登脚未閑
山遊有真趣長在不忙間
右次家君韻

怊悵先期又後期漫凭巖畔弄清池
白雲在嶺鳥鳴谷矯首長吟招隱詩

右次太守韻奉憶林懷諸丈

出洞二首

日夕人將散詩成興未裁
溪聲如惜別泱泱逐人來
不覺林光暮歸來月色多
箇中真意味非酒亦非歌
夜尋鳳離庵

松密月光暗庵高蘿逕懸山僧遙舉燭疑在半空邊

寄贈金新叟 李美叔

尚細

來棲淨水庵忽逢望月僧
聞說二大士文會學日增

言念聚友樂古人曾屢稱觀善輔仁語千載可服膺
讀書貴收心聖訓如面承韓公戒兒作陋矣無足徵
安得合丈席細討深夜燈聊持歲暮懷眷言寄良朋

寄舍弟二首

甲午

無夜不有夢無夢不見君始知手足義宜合不宜分
夕對松間月朝看山上雲幾日宛相逢湛樂窮晨曠
夜寢同衾卧晝食同槃啜未曾一日離何況百里別
如何世累多使我遙思切悵然望歸路寒風吹朔雪

詠史

白首監門賤似泥非狂翻作殺身梯蒯生自有當烹

罪不狂知韓在襲齊

淨水庵次諸人韻

蕭然一刹似西林此地偏驚歲月淡倚柱不堪夫子

感永言聊復和君吟

晦翁題西林寺達觀軒詩見大全

從弟揅挽

乙未

吾家三年少嗟子尤挺出俊容似玉人英英自清澈
八歲誦詩書冷然若琴瑟握管學書字峭快有氣骨
十五轉道成特達謝儔匹不減楊家烏比之白額駟
那知如馨兒竟抱膏肓疾荏苒三春暮風燈苦奄忽
爺孃情所鍾一朝僂永訣簾封未忍開招掌空流血

痛矣以子才季止十有七惜齡又悼命神理諒難識
成人見先祖在子事已畢獨此有室願幽明恨長結
哀我堂從間各早罹禍酷常羨子兄弟獨保天下樂
人事遽如許悲哉尚誰說耿耿去庭闈冥冥就幽室
己而不復見一慟絃俱絕和淚強題詩聊以相引紼

日休齋會諸友步次仁權公韻

人生可比馬牛襟周道于今慨莫尋鬼瞰最憂無主
屋柱膠爭勝不絃琴須從義利明他眼方到窳通定
得心此日朋簪無別語漫將幽抱和君吟

及前一未發等說且謂以初學當謹守古法雖固執
且悟亦無妨切不可先有周便調適人事之意云故

弟二聯及之

又贈別韓嚮九五福兼示諸益

與嚮九別七年始遇於鳴灘觀禮之會仍並
到儒村首尾三日而散

乍似浮萍合還如落葉分三宵歡並枕百里恨離羣
有意資觀善何時得會文臨歧無所贈吟此謝吾君

望月寺寄藏六丙申

山溪谷靜溪清平生所樂在此忽聞鳥聲嚶嚶故人
恨不並轡

寺樓

眼前大野開頭上有高臺差喜勝村巷聊可寄幽懷
宿居士庵

離披百花叢其中有小室一磬復一燈夜夜獨拜佛
玩月

明月出雲端清光照蒲團庭前有梧桐此夜更好看
懷美叔

月出爽氣浮夜久還似秋有懷吳客詠悵然一回頭
寫景

秋蟬晝號樹蜀鳥夜啼月雲去山仍遠烟浮野更闊
寫事

雨餘熱氣蒸煩襟欲懷冰看書苦未能媿彼供飯僧

嘲美叔

不吸三斗塵不識世間味四十藏六叟懂懂何所冀

登後峯望沉郊

鷺白乍似洲草青疑是湖寄語兔園客君知伐檀無

懷舊

望月月長在扶王何處歸悠悠亡國恨山僧那得知

詠浮圖

棄絕父子恩空山浪留迹我今欲詰之頑然一片石

師之初出世也其父三
捉歸竟逃來祝髮云

慎獨齋金先生挽

允矣淵源正荷歟道學宗操存功匪懈繼述業專攻
素履元安禮撝謙自篤恭誠純無間斷養熟到從容
望實家邦達歸依遠近顯九齡終嚮用三命暫登庸
進退時治忽存亾道吉凶微言垂範則懿行起昏慵
寂寂春風座昭昭霽月宵公私今日慟沾灑向堂封

奉別仲父童士大人赴官金溝縣

白首同摩詰玄經待子雲屈伸時命在行止霽潦分
送別何須酒臨歧未暇文封丘還在彼書此且張軍
金溝縣齋即事奉呈仲父案下三首

小郭依營近中門向路開盈函書未答束帶吏還催
邑弊蘇何術人窮詐亦哀殷憂更多故拄笏意悠哉
媿見先生字勞知處士心日埤王事適時至世情斟
儒化功非淺仁聲入最淡一作單父琴何
遠文翁化更深琴堂無一
事誰與賞希音

夜久喧煩息還疑是野居小庭分月滿殘菊占階踈
手整案頭帙倩裁燈下書向來膠擾事雲過太清虛
遊金山寺次金悅卿韻

浮世誰如此地寬細尋苔徑度清湍踈煩自問垂藤
井選勝先登老檜壇沓嶂蒸霞秋色纈滿林飛雨澗

聲寒清風忽憶東峯子三唱遺篇夜已闌

又次李牧隱韻

雙溪鳴玉響山中勝地裝來第一功
文佛昂藏專洞府鍾臺清迥俯琳宮
甄萱事業千年臭牧老詩篇百世風
摠是遊人塵慮絕秋光徙倚意難窮

萱子神劔四萱於此寺

又次張谿谷韻

照耀青丹閣嶽崎土木身頑形欺眾眼
幻說塞千塵功德何須問成虧不記春
旨聾難與語媿爾讀書人

耗靈下土宜是可愛最胡神何瞻仰之有故和韻譏之

登母嶽冢頂

此山蘆嶺以上最高者也西望大海不堪匪風之思故篇中無好况

振衣千仞上搔首問青天萬國兵塵外
三吳落日邊登高偏起感撫迹祗堪憐
漫對山僧坐沉吟老杜篇

宿飛杖庵二首

九日湖山裏千重雲水身石泉寒有響
禪室靜無塵霽月明疑雪霜楓爛似春
吟詩望遠海却憶眼中人靜散行裝得
意遊最憐蘭若翠微頭着身高處曾襟
闊信口吟來物色稠天末海雲疑北固
夜溪郊火似揚州一聲何處離羣鴈却
遣騷人解有愁

王介甫題金山寺有曰天末海雲橫北固烟

中沙岸似西興楊公濟詩又云天遠樓臺橫
北固夜深燈火見揚州金山寺名偶同而邊
山暮雲及遠郊夜火所見絕似故第三聯全
用之九日登高慨莫與兄弟朋友同之故二
篇末皆有此意豈子美所謂情見乎辭者耶

陪仲父會諸人重遊金山口號二首

雙屐着來輕高坐覺神清落照樹間見寒烟林外生
霜重楓欲老地淨菊偏明夜久滿庭月空山唯水聲
勝地擅湖外一旬能再來賓朋如舊識杖履喜同陪
月色宜高閣秋光集古臺清歡有詩句不必勸淡盃

從兄子上搏氏將趁槐黃走筆贐之

豈見不鳴鳥元非無口斃行違應在量溫飽久知拋
世路從茲涉君門直可敲賢愚較一歲水澤有初爻

丙申十月初三日宗會于後村以遙知兄弟登

高處徧插茱萸少一人分韻賦詩得插字

百年桑梓魯丘下面對雞山勢天插東里西鄰可相
望春秋會合高堂狹鋪筵設席粲灑掃剝棗收栗烹
雞鴨秩秩尊卑禮數肅溫溫杯勺歡情洽芬華不用
取世名孝友自是傳家法遲遲澗松含晚翠炯炯秋
蓮光出匣星聚端宜蛾述時歲寒正好龜藏甲嗟哉

阮生怨途窮笑矣杞叟憂天壓停杯回首却悵然曲
中有箴墳還乏禮罷不覺日西夕細雨池塘寒霎霎

酬趙平叔 持衡

瓊琚送我白眉歸情話慙懃耐濕衣離合有時星落
落悲歡無迹夢依依秋淡雞嶽山容瘦春到鷗橋水
面肥會向此中成一握聊將和曲付雙飛

宗孺兄來訪山齋用杜江村韻共賦二首

西峯暝色冷烟流一笑相迎地更幽窗外雪留明似
月松間鷺宿狎疑鷗清言稍喜看飛屑破韻空慙類
中鉤落盡燈花眠不得鳥鳴偏感友聲求 魚懷
羨叔

學道當季遡九流歸來天地閉門幽人間莫作巢中
燕世外須知海上鷗却笑閑心生卻局還嫌大語訛
任鉤諸君欲識吾長物三百篇中誦不求

市南先生過臨為賦一絕謹次其韻 丁酉

陰坡壁立屋連斜栽得禪松護我家早晚蒼髯橫歲
暮不須窓外弄珠花

偕向孤雲哭慎齋先生墓歸次其韻

金聲玉色悅揚靈咫尺幽明事杳冥相視春風座上
客可堪揮泣拜新塋

會滄江觀金弘瑞三加席上賦詩是日乃珍山

金公 文初度也仍次其春帖韻

芳風麗景屬高軒輸得春和滿酒樽髦士禮成仍獻壽世留餘慶待貽孫

珍山文自作短詩使弘瑞詩之客能詩者皆一唱以侑爵拯不能詩仍述其意復呈一絕

白蓮黃菊即為羣老去江湖遠世紛喚取佳兒傾好酒功名真箇是浮雲

送別鄭晚昌 普衍 歸太白山中

昔日識子面今日識子心鱸堂十日游愛敬久逾淡如何忽分手湖嶺隔千岑留之不可得悵黯靡自任

古人贈處諛德切夙所欽臨分欲有獻願以表吾忱
斂束就平實柔克事靜沉分明孔氏書珍重敬齋箴
一片皦然地未許氛埃侵發足始千里努力惜寸陰
木瓜豈望報所冀金玉音秋風桂花發好會期重尋

曉坐口占

素月中天色寒溪徹曉聲虛心看夜氣默坐聽雞鳴
宿華嶽村

四山黃葉已淡秋鳳壑龍淵憶舊遊惆悵獨吟仍獨立暮鴉還處白烟浮

丁酉至月幾望宗會于後村是夕市南先生來

臨胤甫陪至既望設措弟慶席呼韻賦詩二首

鼎鼎浮生即百年片時相樂也關天玄冬喜氣青春

上兩朶荷花一桂邊奕世龍門期不忝遺經韋業慶

能傳崢嶸歲暮陰垂地望裏蒼松夏可憐胤甫新擢弟敬教與

措同榜故云

大雨為冬至崇朝氣未佳非關惜暮歲且可放高懷

好我思周道娛賓咏孔偕龍猪十年戒却憶舊山齋

十七日冬至而大雨三日故云

敬次市南先生石甌道中韻以見區區之意仍以請教

都似堪誇比洛村不謾誰復賦淇園世間此會最和
樂人事經年勞夢魂可是工夫能變化其如氣質有
明昏阿蒙三十紙依舊願得終身行一言

頃日之會承教以為凡人氣質之用為多竊
念古人有變化之說以人力奪天賦其功實
不草草然則以君子觀之則學問之功為大
而以凡人論之則氣質之用果多也拯之賦
質極昏且弱雖有其志而不知用力之方幸
察病加藥使得以服膺焉千萬之望也首句
用邵子詩滿洛城中都似家之語而過存未

瑩乞賜斤正也

又疊其韻贖胤甫免新之行

生涯寂寂閉蓬村
文彩翩翩入禁園
已判屈伸都付命
不須離別浪消魂
冰湯各自知溫冷
山市猶應戒傲昏
業廣在勤功在志
與君唯願事斯言

敬次夢樂堂韻呈仲父鳳岑縣齋

并序

仲父取列子語以夢樂扁縣齋東軒龍西叔
父演其義作長詩市南先生暨家君皆屬而
和之仲父又以命拯故不敢辭敬步以呈

仲尼棲棲思僕僕不遇之悲自古昔百年人間儘須

與遠遊千秋恨不極先生達觀大化外素位而行無
不得老去聊作百里古少時不效童子刻龍西夫子

更清虛

河洛數龍西遇地風升之語

身外高名動南國相

將金石日擊撞元氣淋漓風灑靈俯視紛紛夸奪子
日出勞勞眾形役善喻真知刻禦寇好事猶堪試筆
力要忘反成子微馳助長終歸宋人若賦罷相對一
胡盧寓言何能喻真樂知音自有市南翁半世江湖
享清祿物理游刃無全牛大道好我歌鳴鹿春容大
篇續而和寄我草堂破幽寂我家生涯最冷淡尚論
東京徐與郭功名已將等雲烟事業唯應付行墨忽

見清製滿塵案有似黃金擲虛谷小子殊未識八分
堪媿無能張勝蹟要成報章類狗尾欲廣名義同蛇
足終古從周夢已衰于今捨魯吾何適願誦斯言效
下風未必鄭人爲真覺時行時止折諸聖一消一長
存乎易心定何須假大夢眼明不待登東嶽方知古
人有樂地不在簞瓢與枕曲攻玉敢擬他山石讀詩
自愛淇園竹君不見楊雄漫作解嘲辭好笑終身昧
玄白

病中記事八首

戊戌

抱病在枕席二十有三日戶牖且未窺庭除安敢出

今朝日候溫藹藹春氣溢兒童忽來言菊苗生已密
茱萸着黃花始可見朱實扶杖吾將觀聊以暢鬱壹
久卧不曾步自然軟雙膝徐徐行復休看我菊茱畢
氣虛難久游還歸指密室翻思向來危一死未自郵
嗟爾菊與茱再見那可必如今更何憂即事試吾筆

又

鼻塞不嗅口味爽眼垂玄花雙耳聾得病二十有五
日僂作質質老醜翁縱然飲食且言語昏昏如在醉
夢中聊將書冊遮睡眠精神短乏不能窮夜長輾轉
不得寐苦待曙色生窓櫺日復一日無歇期安得神

方發我蒙可憐不復作完人抱此殘疾甘長終

又

耳聾不復聞雞聲開眼屢覘窓色曉曉來攬衣臂無力起立兩膝如風掉終日密室無人窺獨卧獨坐何悄悄時有風頭來撲戶聲似雷音使心擾婢來三時進饘粥自家飢飽不能了向昏唯伴枕與席啾噪只聽簷前鳥夜淡奴輩直宿來鼾睡便徹東方皎如許一日復一日快豁未易還纏繞有時鬱鬱不自堪起來開窓首空矯何時病去體自輕扶杖東山恣瞻眺

又

課奴栽松與栗

昨日天雨雨今朝日又陰呼奴作氣言栽木正當今移松使依行移栗使成林築根貴堅固開土最宜淡奴也唯而去丁寧爾往欽不能躬往觀憧憧空在心氣餒負席卧暫坐增呻吟默念此病死萬事莽沉沉生前有經營休了何處尋病中聊一笑誰與話此襟

又

憶昨危急日了了拋萬緣唯有一念在耿耿難捨旃吾人昇付大五性無不全求之是在我復焉乃爲賢苟有志乎此最不可無季偶爾得斯疾一朝遂溘然不惜壽不長惜志中道捐不秀或不實懸知命在天

然猶有此心是亦私意牽學力無所得於此足徵焉
如今幸不死勿藥日向痊爾命庶可延爾志庶可傳
人生疾病外事故苦纏綿爾既有志者不宜久推遷
白首竟無成臨死真自憐當時悔無益抱媿入黃泉
病間試拈筆聊用寫幽悃持以置座右可作自警篇

又

久病多枉友朋書枕邊戢戢如束笋愁來披豁暫欲
蘇一字奚翅千金津親知問訊或有無心裏便覺生
畦畛窮人望人自區區季子一言人情盡翻慙吾爲
淺丈夫丈夫喜愠當須忍彼情未必有親踈或是人
才敏不敏不及情恕自裕如責人責己最喫緊因念
遲弛莫如吾到處失忘嗟可憫存誠克勤庶幾乎奉
持二言期無隕私意胷中一掃除向來蒂芥堪付哂

又讀韓詩

少日解看昌黎詩祇愛雄富無津涯邇來束閣六七
年所業在他未暇窺病中呻吟無所事偶有一帙來
相隨閑披舊讀得重尋但覺意味非昔時每到言外
心會處忽然高詠忘今古詩哉詩哉本如此自念如
今可與語此時正好着工夫庶幾化之如時雨嗟余
鈍根材力短安有餘功更及汝

又思兩姪

大兒豐碩性識醇小兒端好多精神語澁猶記易詩
字賓至能治拜跪禮別來月餘苦懸戀眼中黯黯常
如見桑弧在手竹馬橫青衣赤帶雙眸明前者唱于
後者喁英英如玉參差行思渠一日如三秋問渠頗
思病叔不朝朝坐計相見日一日指或再三屈來時
莫暮須趁早見爾吾當左右抱

次崔慶遠世慶韻并序

辱投瓊琚燦爛盈案病中得此真厚幸也詩
情懶廢無以效響而重違盛意草草和呈至

於金門訪友幾致明主之問故園逢迎足見
渭陽之情則亦宜一一奉酬以稱雅教而不
病強吟古人所笑茲不敢作刺語以爭多非
敢故取揀珠之譏也唯吾友之恕諒之也

無心當自遠有意却非貞君看紀涓子莫以醉為醒

紀涓子莫以醉為醒
純後外物不敢犯其養得

右次其却妓韻

又次其村居即景韻二首

霧捲雞山夏日晴清和時節眼偏明襲人可愛莊生
燕知止偏憐孔叟翬萬物靜觀皆得一心安養儘
平平自從病後恆多卧分寸工夫媿友生

明齋遺稿 卷一
綠陰芳草滿庭前不覺今年已半年
厭聽流鶯啼款款愛看雛鳥習翩翩
外言至處須求己人事修時可責天
珍重莫漫詩句好夜歸書史畫于田

又次其閑興韻勸其讀書

人生不要氣如虹當面分明路
逕通必讀會知夫子教空談
莫學永嘉風誰將醜酒尋花興
移入明窓靜几中天上神仙元識字
有丹方可語參同

又次奉和七山韻

閑倚茅簷獨看天一江雲樹望中綿
遙知杖屨陪從處風景依稀似洛川

家君承

召入京陳情不謝而歸次聽松先生

壬子應

命還山之韻以見志市南先生和而

諷之仍及尤春諸文之事謹步其韻三首

此理初無道外身自新方可說
新民正好四隣耒耜出不妨安坐見陽春
右述家君本意

重道那容不重身可行天下是天民
至誠感處功還大養得穉陽儲一春
右說尤春志業

管取人文侈一身叟教天放作閑民
四時最好清和節未必佳期枉惜春
右和卒章之意

奉次市南先生韻送常山使君鄭丈

三首

明齋遺稿卷一
嶽崎真氣象灑落好曾襟自有萊蕪節誰知彭澤心
行裝湖海上活計太山陰喜得荀明御難酬屈子吟
官人身似野人身夫子何須羨逸民真樂若知無內
外胷中長有四時春
誰起黃池雲水身小官猶可及斯民道州之考扶溝
字絃誦聲中百里春

參奉堂叔父挽

嗚呼叔父我家良人道白箝于五常溫其如玉抑若
揚悃悞不學時世糴孝悌天性不待強睦嫻世德習
與長好述更得美孟光和鳴琴瑟聲鏘鏘堂上老人

壽而康共承左右養無方半世墓下抱病藏採山釣
水閑相羊晚名一藝升國庠俄將仕籍通天閭塵埃
豈不厭趨蹌反哺有願斬一償那知二豎入膏肓一
卧不起新未嘗鳳飛鳳逝比翼翔蘭摧蕙折罹春霜
鶴髮夜哭九斷腸嬰兒中路呼爺孃作善降祥反降
殃天乎天乎竟茫茫憶昨鬢遷向洛陽斗酒餞別魯
西堂小子離席祝一觴早奉毛檄來南畝歲暮賦歸
復我鄉東阡西陌依梓桑春秋佳會丙舍傷骨肉湛
翁歡無央丁寧此約不可忘奄忽人事堪悲涼叔父
平生謂我臧眷愛最異諸姪行己丑之冬拭也亾向

我投杖號穹蒼邇來十年苦分張京鄉落落空相望
竟闕省疾與奔喪幽明始終多慙傷逝與二季共攜
將勗以小宛之四章為善思貽言孔彰不食其報後
必昌雙旒翩翩返舊岡秋風蕭瑟秋山荒厚夜無晨
封若坊緇謳一曲雙涕滂

宋誠伯

基厚

兩親遷葬挽

庚子

世家德義人共知女士徽音配得宜逢臧迎凶奈有
時鳳飛鳳逝還相隨幸哉有子合名貽夙興夜寐敦
孝思九龍之原佳宅移重泉劍合百年期積善餘慶
聖不欺伯道未須憂無兒生芻一束古人詩欲往遺

之病支離

誠伯四十尚未有嗣當以為憂故篇內云云

贈胤甫內翰

尺素每歎難盡意益簪堪笑又忘言不於路徑先明

眼天下無二道而過與不及之間優劣出無限階級
幾希矣具於方冊者兄當自知之今日所當講者則
有說焉先生之疾思遠猷常主於知時識勢好謀成
務而尤翁之二直截剖判則每以枉尺直尋計功謀利
為至戒是二者常相為用而不相悖則道未嘗不一
也賦學之者不善學之則常有變至道之機猶為元
者在易為滅項之凶狀尚有一變至道之機猶為元
答也不及者則在易為不拯之隨其流必入於汙
苟賤之域不啻不快而已為學之始趨向不可不審
幸以仰復於過庭之際而回教之也且世俗所謂涉
世之塗又有二焉起自草野者目之為儒道發於科
目者目之為常調者知進之為禮而不知
自處皆歧而二之所謂常調者知進之為禮而不知

月齋書高

卷一

三十七

退之有義知爵祿之為常而不知去就之有道至於
 行己處事莫不唯流汚之是同意寧有是理哉程朱
 夫子退栗先生獨非應舉得仕者耶亦在吾自處之
 如何耳發軔之初擇術不可不謹亦未知兄意以為
 何**安得風波有定跟**夫天下之隨感而應雖於中故
 軀就死亦沛然行其所無事矣苟理有未明心常暗
 塞猶免若猝遇急流處則計較之私撓其守利害之
 過俸其外手忙脚亂措身無所其不為貽譏一時取
 形千載者鮮矣此古**取友規模須細講**取友之道欲
 人所以貴窮理也此古**取友規模須細講**取友之道欲
 則常得其不耻之者而自重有耻之士不可得而友
 之矣自重有耻之士既不得友則所友者不過朝市
 勢利之交爾是安知有所謂忠告善導之責哉故愚
 以為仕於朝者必須得局外守靜讀書之人以自輔
 以從庶免城市之惑矣洛中之士吾知二人焉李養
 以朴和叔皆畏友也苟於夙夜之暇定省之際必就
 二人者與之切磋講劇則其浸灌栽培之功決自盡
 不淺鮮矣狀治身不嚴好士不誠則人亦不肯自盡

此則在兄之**看書功課要重論**聖賢之書孰不可讀
 加之意耳文字尤覺親密論孟庸學兄所熟也今只
 切故程朱文知其新而已所讀則須取其意篤信而踐
 可溫其故而存心於檢身內而悅親正家外而取友事
 子書節要封事雜著等篇深思而得其意篤信而踐
 其實則於存心於檢身內而悅親正家外而取友事
 上將無所往**憂人却犯芸田戒相送秋山獨閉門**
 而不得矣

為學之道無他在知與守而已書者所以致
 吾之知友者所以輔吾之仁此從古聖賢不
 易之論也然知也守也其法也書也友也其
 具也所以行之在乎其志苟無其志則其法
 其具徒為無用之物耳今請問兄之志欲為
 君子耶為小人耶欲為忠於國而利於民耶

為祿其家而容其身而已耶道二仁與不仁而已矣出乎此則入乎彼差之毫釐則謬以千里此則在兄之自知之如何耳非他人之所能預也若弟者名為講學而實無所得愚不能明柔不能立非無師友書冊之樂而終是有靠不得者自憂之不暇而猶復為兄言者是亦故人之情而亦欲以自警者也盍相與勉之哉

宿李一卿 相變 莊舍

辛丑

十季情話付孤釭不覺寒風入破窓安得移家向此

裏與君終日對秋江

宿坡山院齋

浮舟赤壁望花亭牛浦歸來山月晴玉色金聲如昨日塵魂猶得片時醒

次南宮表叔韻贈申居士 澹

為武為文誰不如多能兼又習乘除祇今可惜頭全白且抱兒孫教讀書

從舅母尹氏挽 李公楫內子

孺人有閨範塞淵儀如一持家得和整接物務誠質謂應享壽福寧期終此疾淑善竟無命神理諒難悉

宗姻共憐悼隣並爭嗟啣我舅尚抱病扣盆神內傷
鶴髮欲誰歸筑筑號北堂佳兒未畢親死生遺恨長
提攜幼弟妹日夕呼阿孃人事遽至此惻愴那忍詳
愍余早靡依慈顏痛日遠賴有涓陽情少以慰哀怨
况蒙視子妣厚義良惓惓省候未旬日計書劇驚惋
旅程負臨穴悲懷寓哀挽大哥學有志見托相磋切
文行即所慕芬華且不屑嗚呼丈夫難庶幾彤史烈
思貽在必果爲孝貴不滅持用勉棘纒幽明媿薄劣

再從弟敬中

抑挽

壬寅

冉冉浮生但若斯箇中脩短竟誰司已聞禍慶空垂

訓方覺岐軒枉教醫妙藝祇今嗜有女絕行終古鄧
無兒最憐長得三珠樹春日猶餘一病枝

明齋先生遺稿卷之一

明齋先生遺稿卷之二

詩

平昌路中遇江陵使君權正甫

格

壬寅

溪谷惟聞雜鳥聲
倦驂斜日遠游情
忽驚皂蓋穿林
出道是臨屯太守行

次覺玄軸中韻

東遊十日得茲山
流水浮雲分外閑
更有老僧詩卷
好朝來一破客中顏

金剛淵次栗谷韻

新羅世後二千年
王子修禪事杳然
惟有于筒泉底

水月精門外湛空淵

權近記于簡之源有菴曰月精昔新羅二王子遁于此修禪得

道云

杻峴遇雨

乍看昨夕雲屯聚不謂今朝雨驟驅
激激一川喧急石陰陰萬木夾危途
橫溪驛路知長短杻峴村居竟有無
但使農民手加額任教行客溜緣鬚

投橫溪

杻峴衝雲過橫溪冒雨投逢僮話道路對竈燎衣裘
不有名山興那堪遠客愁提攜篋中帙更向小窓頭
滯宿橫溪夜吟

空山風雨夜千里一癯儒枕上有詩句愁邊無酒壺
小溪何喜睡征馬尚貪騎起坐還成卧寒雞屋角呼

五峯書院謁夫子真像次退陶先生韻二首

曾聞祠廟在臨瀛遺像今朝拜肅清
脚踏關東一頭地塵眸刮得十分明

鳶魚臺上偶題名風咏樓中暢遠情
退老詩篇垂事蹟栗翁模範示功程

三日浦次石刻韻

扁舟三日浦獨上四仙亭坐石俯明鏡
撫松看翠屏舊聞極雅麗翻嫌非潔清
沮洳作洲渚陔剝其軒楹

詎逢鸞鶴儔難聽笙簫聲香碑石空在丹書字未明
瞻眺意不愜歸來青草汀若此是仙境何地無蓬瀛

榆帖記事

百川橋頭訪玄蹤盧雋泉邊一逕通逾嶂越澗四十
里有寺獨擅山之東三重華構爛朱碧十層寶塔光
玲瓏峯巒雖讓內山奇地勢却說頗淡雄童土先生
魯陵守水城使君烏川翁蒼顏素髮靜相對宛似園
綺商山中笑看人間手脚忙肯許凡骨來參同座邊
喜是衛叔寶林下慙非阮仲容芳樽相屬石門樓日
夕爽籟清心曾酒中何事忽悲慨舉目天地腥塵蒙

不能長往入河海且復遊走隨蒿蓬暇日逍遙豈真
樂有時危涕垂雙瞳空懷千載邵堯夫大平烟月嵩
岑風

陶淵明高卧北窓下自謂羲皇上人可謂無
所憂矣而其辭曰樂琴書而消憂則憂終不
能無而晦翁所謂不可謂不悲者蓋可想矣
然則今日海山之遊亦一漫興耳其視安樂
老子萬世高高看太平真樂攻心不奈何者
氣象何如也故篇內云云

萬景臺次栗谷將入內山韻

初登萬景峯倏與塵寰絕舉手問毗盧更從龍淵說
上下極高深了此方休歇

船潭呼韻

武夷三曲舊藏船移壑何年在此淵我欲張帆浮大
海長風萬里去悠然

遊九龍淵歸題彌勒石上二首

夢遊成子已無迹月落洪生空有魂溪求隱僻豈吾
道不立巖牆真聖言

鑿山開道謝靈運咋指悔狂韓退之却恐後來人又
悞一言畱與石間知

東洲笑仙有夢遊九龍淵之說其事甚奇今
見卧遊錄洪生名漢仁嘗遊此山耽賞溪淵
溺死不還有詩才好遊山水嘗有詩曰朝上
白雲峯頂觀暮投峯下孤庵宿夜深僧定客
無眠杜宇一聲山月落見清江小說

萬瀑洞次栗谷先生韻

雙鶴臺爲萬瀑門火龍潭向黑龍奔石獅右挹香爐
氣五老南連穴望雲真佛淡庵夏畱雪觀音幽窟晝
猶昏劉崖大字人何去應有歸來洞裏魂

普德窟次楊蓬萊韻

銅柱孤撐斷石邊騰身斗覺近諸天一僧夜夜參幽窟清磬聲中細縷烟

正陽寺次申企齋韻

問爾為山壽幾千粉粧零落老婢妍人間漫結三生願鶴去臺空亦百年

山石本色黝黑其白者粉苔也其有媿於玉名久矣且金剛臺上舊有青鶴來棲今不見已將百季云故戲反企老意而嘲之

又次鄭湖陰韻

名山何不早言歸新浴由來必振衣壁上題名多少

客幾人真箇悟前非

又自和千字韻

峯巒峭拔多奇氣洞壑清幽有道味只為盛名盡副難更求其比應全未

李稼亭東遊記已有所見不如所聞之歎然舍而他求指應未有先此山屈者則始到名下而輕肆雌黃或者近於淺率乎遂賦此擬為山解嘲云

又詠湖陰事

平生誤入石崇廁抵死未醫和嶠癖靈境難留香易

日齋遺稿卷二
銷一宵一悔嗟何益

望高峯

毗盧正中立望高挺其南毗盧萬丈長望高欲與參
崢嶸露頭角偃蹇不肯屈騰凌勢相感突兀上如許
鐵鎗三四垂攀援衆生走石鷹助風采雪爪兼霜味
殷勤衲衣人要我共觀之一往誠不難吾心良自疑
吾方指毗盧將造毗盧極苟不致吾志無乃分吾力
珍重石潭翁惠我登山說爲我謝望高今朝與爾別

毗盧峯次晦翁韻

泠泠似御九霄風豁豁方開萬古曾從此金剛傳勝

蹟晦翁詩在最高峯

次栗谷楓嶽三十韻

書冊埋頭三十年不暇偷閑事遊屐嚶嚶我思古之
人紫陽先生愛廬嶽翩然一出圭竇中此身已到金
剛麓初從百川得榆帖老栢千章翠落落山映樓名
擅一洞石作虹橋跨傑閣佛頂危石插腦後宛見銀
河十二瀑山東特立號彌勒譬如俊父出千百羣峯
合沓拱日月萬夫之雄在其北輕籃飛過鴈門嶺窈
窕摩訶藏右腋褰裳去襲九龍淵泄霧噴雲洞府窄
欲爲諸葛武侯祠西原隱者今難得歸來却煩雨師

送爲我一番洗林壑正陽寺裏二日留望高諸峯面
前碧七潭白石玩飛沫迸落玉盤珠百斛僂欲仍之
托銅柱學得餐芝謝飲啄居然選盡表裏勝堪笑吾
心未云足攀蘿更指毗盧頂此地豈容人扶側舉足
愈數身愈高石磴分明有舊迹振衣千仞始豁然萬
象森羅浩無極山間勝妙自呈露向來區區勞抉摘
大海茫茫眼底闊日輪昭昭頭上白今朝始副百年
心方喜吾行不虛作何人妄說住曇竭有客空談控
鸞鶴爭奇騁怪極談詭舉俗昏昏長夜宿慙慙二十
八字刻庶刮千人萬人目還將名姓記石間好醜能

無有媿色清遊到此自忘歸不知崦嵫日將黑後來
來者莫持疑此境於人本無隔惆悵平生二子不
能同來共吾樂濡毫漫和石潭篇遠寄良朋慰相憶
摩訶衍次栗谷韻贈義玄

空山獨自宿小庵幽磬鳴開窓看月色高枕聽溪聲
愛爾白蓮徒共此清夜情

次栗谷贈僧韻詠廢庵

峭壁攢峯面面同高僧一去小庵空無人解語山間
趣澗水潺湲月影中

憶新羅王子

居僧只解參無竭行客無從問草衣魂與劉謚遊地
下祇今唯有舊山薇

贈檢帖僧熙演

閑行何事却忙迴十步令人首九回山衲不知塵念
絕慙懃爭願作官來

鉢淵庵

鑿巖如鉢象汗樽鋪石為筵敞洞門別有寺僧呈伎
倆一番馳瀑一番喧

蓬萊島次紫洞韻三五七言二首

一金剛二蓬萊元化別有天紫洞風滿臺知爾神情

非俗物何不化鶴復歸來

萬瀑洞刻
元化洞天

西金剛東蓬萊不以佛號巖即將仙標臺一任二家
互爭奪獨取山間清景來

宿雲巖驛

年年大旱是何祥日日風埃翳日光底處有人憂社
稷祇此無力念穹蒼江湖後樂范文正畎畝願豐朱
紫陽且爾嬉遊空漫興獨瞻雲漢望吾王

南江舟中次海山亭韻

清江一帶水白石七星洲地擅關東勝亭臨海上浮
扶搖疑鳥運汗漫想天遊無限斜陽裏輕舟更湖流

掛鍾巖

奇奇妙妙盈天地物物誰非雕刻痕千載旨聳漫相
駭老蒼臨視但無言

水城次板上韻

雙眸看盡海山幽忘却關東客路脩何意一樽元亮
室更銷三日仲宣樓風微蓮閣依依語日永尊潭款
款休此會人間知不易明朝回首是溟州

仙游潭次勝覽韻留別水城使君

長松對坐覺神濃人事寧期此地逢聽說桃源重感
慨此行還媿未從容

杆丈為言襄陽五色之勝勸來
上等且令歷見而忽忽禾果故

之及

贈別尹君則

憲卿

山映樓中初識面仙游潭上却分攜請君好記同棲
約他日尋源逝不迷

君則謂君若來棲五色則吾
亦當從之卜隣云故及之

洛山寺次板上韻

不管道消長何知人樂憂且將弧矢志聊付海山遊
首夏清和節梨花洛寺樓滄溟正萬里日出彩雲收
河趙臺口呼

奇峯突兀八波心十里松間冒雨尋遊子何知河與
趙倚巖空復費莊吟

洞山館次板上韻三首

遠客無愁似有愁
微茫烟雨暗汀洲
凭軒默筭東來事
千里程餘一月遊

神仙恍惚使人愁
碧洞山前一海洲
丹臼石槽誰復管
古人遊處後人遊

物色何曾解有愁
殘花飛鳥自沙洲
等閑一到還歸去
脚踏休言勝夢遊

竹島石槽口號

觀瀾亭下喚輕舸
蒼竹島前看小槽
天恐一元磨易盡
故將圓石放洪濤

勝覽島下石凹中有小圓石諺傳圓石搖轉其中磨而成凹磨

盡則世改云今來不見所謂圓石故戲之

雙閑亭口呼

蒼松落落帶晴川
處士遺墟石一拳
可惜青氈拋海上
行人但式古碑前

鏡浦臺次勝覽韻

不見丹丘與赤城
問他誰似此間情
天光雲影平鋪着
小島長洲點綴成
解道風來水面語
恍如人在鏡中行
虹橋已斷仙蹤遠
惟有沙鷗似雪明

見故云

所謂近門橋不可復

又次朴三可韻

一語知君着意淡中流高詠起余心湖光正爾清如鏡恨不同時得與臨

觀日出

極目滄波似遠山金烏飛出五雲間不知有底相催促日日東西去又還

鏡湖堂次板上韻

湖上名園竹作扉湖中好鳥雪爲衣漫留物色供遊客何事主人猶未歸

松潭書院

金剛直脊走太白肢股離披漾海水乾坤軒豁日月

明着眼山河皆信美齋東野人習迂怪千載唯知四仙耳我來行行訪舊迹慨無一片名教地不有松潭廟貌存誰洗關東一方恥松潭迤北北坪村栗谷先生乃降此豪傑之才聖賢學五百季間名世士新安瑞井尚無恙黑龍冲天八十祀豎儒長跪拜堂下肅肅如遊函丈裏平生志業已難問世道滔滔今若是賴有遺書炳如日畱取光明百世俟海澗山高自依舊鍾精孕秀無時已磊磊勃興會有人嗟我青衿二三子

江陵倅求別語

知君恥效俗曹兒進學端宜及壯時杯勺既能剛制
酒槩鉛仍不癖吟詩警眠自有溫公枕消日應無李
遠暮好讀栗翁書四冊一生忠孝備於斯

許李臺

山嵐連海海連空東勝奇觀盡此中酒可禦寒知有
力詩難寫景媿無功

觀採鮓

一點鯨油徹海空翻身出沒亂濤中問渠何術能如
許只是三三二二功

即習字說
見語類

羽溪贈玉泉齋主人秦克忠次壁上韻

細雨迷溪縣危途恟火飛主人情似舊虛館客如歸
見竹幽懷動看山世念微仙源如有問吾且說秦衣

竹西樓次板上韻

逢迎千里陟州樓爽氣泠泠五月秋脩竹晴川真絕
境秀眉華髮自名流雲山世外看來樂川洛人間說
着愁作底風波滿平地却歸閑處伴沙鷗

異言一出讒人嗣興士類瓦裂國事壞了主
倅許公即其時首事者也反獨超然自在享
此樂地之清福令人不能無追恨故篇內云

云

冒雨踰百復嶺

天時自不無風雨行路元知有險艱馬上吟詩殊未
已此身長得一心閑

臨溪驛次勝覽韻

天陰何漠漠客路正迢迢已喜逾重嶺還愁渡圯橋
行穿林谷邃回指海山遙却訝田如踐人言電打苗

旌善次勝覽韻懷李雲長時翼

一溪穿峽裏孤屋托林間有路寧通俗無人得見顏
君今真隱者地是最溪山待我尋源日桃花慎勿慳

濯錦亭次黃翼成韻

來乘錦江艇却灑錦亭風意與白雲遠愁隨流水空

客館次李藥圃韻

水有重江合山無一面通新亭尋濯錦舊事問觀風
物外烟霞古人間得失空愁心與清興都付一樽中

滯雨又用前韻

滯雨愁何歇思歸路不通清冰難濯熱高閣也無風
安得生雲翼飄然截太空苦吟殊未已徙倚水聲中

錦亭觀漲次板上韻

雲圍四嶂暗林擁一江明兩岸衝疑裂三灘咽不鳴
平沙看漸沒遠水覺方生忽見垂綸客遙聞捩柁聲

暑

雲逗天邊樹不風誰能脫此大爐中秋菰水玉全無
術靜坐看書却有功

聞蟬

今年浪走海天東長夏優游越峽中數日蟬聲清滿
耳令人回首遡高風

濯足

步出磯頭日正沉風來水面爽人心平沙雨後明於
雪赤足當流浩浩吟

有感

遠宙無心出白雲孤舟盡日掛江濱如何窈窕崎嶇
地不見經丘尋壑人

讀文山集二首

欲觀單闕南車錄須讀敦牂北闕書千載有人東海
外一朝三復涕盈裾

獄裏虹光射斗牛男兒蓋棺事方休黃冠豈是儉生

計當世知心麥與畱

公詩有蓋棺事方定
挑燈看劍頻之句

元主初欲不殺公元參政麥朮丁嘗開省江

西親見公出師震動力請殺之蓋有養虎遺

患之慮也宋官王積翁等十人謀請釋公為

黃冠師留夢炎私謂積翁曰文山贛州移檄之志鎮江脫身之心固在也忽有妄作我輩何以自解也遂不果愚嘗疑黃冠備顧問之語似非文山本心今觀此始覺其乞歸之意而木丁與夢炎者已潛覲之矣木丁元臣也彼夢炎恨不萬段

東閣即事奉次仲父韻二首

烘烘朝曦滿閣東着身無處類途窮正陽恨不加千尺遮斷炎鳥不敢紅

又東正陽山

蒼然太華鳳淵南朝暮遙看瀕洞嵐聽說冲曦碑已

折千季興教一伽藍

右南太華山

削嶺刀山表裏西青烟綠樹淺淡齊思歸一夜愁無寐立倚軒楹看月低

右西刀山削嶺

書事

狗毫松板戲章草枉矢哨壺時拾投更有掃塵功課在檢來粗免素餐羞

即事

翠葉黃花夕露團決明階下正鮮顏臨風三嗅馨香立忽憶儂家種藥欄

七夕二首

百七光陰客裏拋坐來清露滴林梢寒蛩有底難平

事月白孤吟似孟郊

余三月廿一日辭家東遊

虛堂夜久枕生涼積雨初收河漢長不管牽牛與織女卧看新月下西墻

奉次仲父于越吟

峨洋終日對江山剩道高人得地閑官樹童童雲影裏民家點點水聲間空同自愛庚桑壘道德翻疑令尹關欲識箇中舒卷用無心出岫倦知還

游仙巖追次仲父韻

人與江山總作三歌將絲竹共登巖良辰正喜當秋

日佳境爭言勝島潭二客攜壺思壬戌孤舟尋壑憶陶潛雲端已遣懸新月吟嘯無妨到夜深

贈鄭美長

漢

招招谷口我朋真秋日仙巖霽色新江上清風峯上月琴中山水酒中春名區自喜頻揆勝福地君能早致身相送船頭波蕩漾滿衣零露影粼粼

遊立石追次仲父韻

新秋物色媚晴天雲影山光蘸碧漣誰削三峯抽百尺將崩一石立千年疑逢赤壁玄裳鶴想見高陽錦里仙向晚移舟下急瀨笑看輕浪濺賓筵

又示美長及朱必慶嚴惲二秀才

已訪仙巖泛紫淵還尋立石入西川團歡此日元非約辨勝他鄉似有緣關外孝廉朱儁少越中章甫子陵賢翻思鼓柁龜潭去一曲滄浪興渺然

發船日敬次仲父韻留別從弟子敬摺

一棹飄然豁客愁虎巖驚浪拍船頭惆悵惠連猶抱病琴歌不得共登舟

送別李晦卿益烜南歸

寒齋白雪歲將翻感子臨分覓贈言却怕古人鸚鵡戒不知何以答慙慙

千里相逢漢水涯歸來攜手鵲泉齋三餘講習從容計怪底今朝便作乖

學要近裏方為己書不精思枉費功今日不須求別語好歸尋取聖言中

癸卯元日歲事罷會宿于淨水庵子恕天宇從再

掛弟國材從弟種百從弟同會夜次石洲集韻

會合方連膝吟哦且曲肱新春初吉日良晤半宵燈素志驚時節空餐媿寺僧諸君更努力無事久因仍

敬中改葵挽

長痛吾門喪此賢至今令我涕涓涓藏修有約歸何

地志行無成奈彼天每憶子荆悲怒事空吟康節棘
蘭篇前秋又哭堂兄逝不忍階庭便索然

金副正 友淹 丈挽二十六韻

代序溟王遠風猷浦老新猗歟如世德展也得天真
曠宇容餘子高標隱數人髫齡能篤孝弱冠即親仁
信道誰能挽了昏竟不磷為官始強仕領邑近中身
舊有雙歧麥今看五袴民治先絃誦化績軼龔黃倫
偃蹇經三土婆娑奄六旬可憐廊廟具虛老簿書塵
落落柴桑賦迢迢錦水濱無心逐鍾漏有樂卧松筠
義為隆師重誠仍到老純依歸尊廟貌肅穆薦精禋

耆舊今誰在康寧福自申如何嗟大耋不復見新春
壽考年奚憾循良蹟未湮最悲人泣樹無賴夜稽辰
已說祥生善還聞屈有伸階前知種玉席上已稱珍
小子非才甚平生荷愛頻開懷良款款道舊極諄諄
憶昨陪朋酒登筵祝壽春蒼茫翻似夢寂寞摠成陳
筮日歸真宅開堂會祖賓薤歌數三曲春日共沾巾

韓上舍 震溟 挽

一時季少競翹翹聰秀如君故自超每詫吾鄉不寂
寞那期仁里俊蕭條妻同古劍埋猶合身似春冰迹
亦消最有孳孳憐二季共扶孀母哭蒼霄

羅海州星斗文挽二首

共謂公才不止斯如何一疾遽長辭只將循吏名垂
史空遺遺民淚墮碑安定風聲今索莫夢翁家事益
悽其且看勤讀書兒在天道終應有報施

當時一識許開襟淡媿君俠愛士心今世厚情那易
得古人風味已難尋屋樑尚想真顏色箱篋猶藏舊
德音疲茶莫伸雞絮義漫憑虞殯寄哀吟

頭流山人敬一自徽公房挾韓文來過留一日

臨去求詩戲贈之二首

甲辰

僧自仁同至言歸智異棲一聽談鶴洞心已在雲溪

學文非爾事求句亦徒勞世上一名字令人都不高

寄徽師二首

三年不出山朝暮面蒼壁何惜一詩來茅簷破幽寂
老去且趺坐無為猶庶哉近聞新秉拂能不負如來

市南先生挽三首

名德淪徂世漸陵近來夫子獨重興文章本自根經
得器業元知用學增中夜淡憂存大計一時宗主作
真朋位年未滿身先盡天理悠悠竟莫徵

十年湖海若將終晚節 王朝竟匪躬玉汝實惟勤
聖考奪吾那不怨皇穹經綸未展胷中蘊著述空虧

靜裏功流涕古人被髮語此懷天下有誰同
親依教育自髫年恆媿愚庸荷愛偏華剡固同君寶
義微才奈負器之賢方期歲暮從江上誰謂今朝拜
柩前此後報恩唯不忝願垂陰祐俾無愆

酬朴和叔世采

睡起空齋坐似尸我朋書至夢先知驚披乍慰離羣
日細讀全如對面時太息中興能見否平生讜議只
聞斯謳吟欲和西歸什難盡當年北望悲時和叔有書論復讐

之義不能無異
同故篇內及之

始得明季遺聞為之掩卷流涕復次和叔韻以

寄之

痛哭煤山詔裂尸蒼茫天意竟難知千年禍變無前
世四海臣民見此時內外寇攘唯等耳秦新美劇彼
何斯古今最有桓靈恨不盡忠臣義士悲

穢史本出於薙髮之流不足多責而虜書所
謂得之於流寇非取之於明朝云則即溫公
之見誤於曹瞞者而此史乃表出而稱誦之
以歸罪於西歸功於北有不容不辨故第三
聯云云堂堂天下一敗塗地求如晉元宋高
而亦不可得悠悠蒼天此何人哉末句則無

明齋遺稿卷二
所歸咎之辭耳未知如何

白丈弘望挽

名賢之後苦沉淪此理由來有屈伸六十光陰真似
夢江湖蹤迹漫成陳遊魂好去依先隴餘慶應畱付
嗣人最是羈鴻行已斷不堪孤影叫霜旻

李伯瞻顯挽三首

美質季應得高門福未央那期事如許始覺理難詳
短命同顏子多男有馬常只今空已矣斯可慰爺孃
上舍名能早爲官學有餘知非老草莽謂必大門閭
一疾重泉隔浮生萬事虛淒涼錦江畔不忍有新居

霑潤君如桂門闌我得龍斯文同臭味函丈幾從容
吾黨嗟何罪今年屢報凶翻思識面歲魂斷舊霞峯

哭宋希張二首

魏國欽夫子英聲自妙齡靈春殊未老玉樹已先零
大數元前定流季苦不停傷心獨立處無復見趨庭
四十寧非天銅符未是通高才而止此天理竟難窮
禮樂同遊地江湖暮靄中牲碑有絕筆畱作士林恫

與崔慶遠俞德操命徽宋來伯基泰自七山歸

石湖題名於聖林寺少憇於趙家亭夕同舟渡

江次慶遠韻二首

日齋遺稿卷二
虛亭擁百卉十里見平津取次成佳會何須問主人
感舊尋春寺藹壺渡夕津相看無限意俱是不期人

振威

熙績

兄挽

大耄恩方賀寒泉訃忽承驚疑初莫定禍福竟無恆
儒素元成教謙卑早服膺惇行存孝謹恪職效廉能
但任吾真率誰關彼黜升兒惟聯衛壁孫不羨張憑
五十身仍健平生壽有徵爭期晚景樂剩得國人稱
笑語季纔改存亾料未曾蒼茫真幻夢迅速本泡燈
病蟄空神越哀吟漫涕凝秋風如一哭宿草訪坡陵

權正姑夫

雋

挽三首

溫然如玉燁如芝故是風塵以外姿俗態不曾存一
物閑愁那得到雙眉用賢不早嗟何及齋志無成理
却疑會有詩人吟殄瘁中宵迸淚豈爲私

堪嗟世道日營營末契誰將話此情左海初心思魯
子安陽晚節識毛生屈伸有命吾何與榮辱由他我
不驚豈弟曾無脣壽報令人猶欲問神明

四年貽阻昨年逢情義從來子視儂顏貌不隨憂戚
變襟懷相照笑談雍誰知此夕成長訣無復今生覩
舊容秋後月川山下路那堪宿草沒堂封

李益之

惟益

丈挽

德門餘慶盛於斯處士平生數獨奇學字無名真可惜長貧不壽益堪悲青山舊隱荒烟斷錦樹新阡白露滋會有世間伸屈理一經遺業四男兒

崔子真

後望挽

哀哉崔子真賦命一何薄平生有千苦到死無一樂學字不成名窮廬歎枯落學稼不得秋舉族長飢色有妻扣盆歌有兒投杖哭纍纍起新墳寥寥托孤屋出門蓬沒逕入門椽打額日晏爨無烟空腸雷吼作冬衣未掛絮波吒度寒谷窮愁恆滿顏雙鬢已成白一卧僅經旬居然隕精魄黔婁不斂足紫極欠半百

哀哉崔子真孰不歎子隄我獨爲君言君今返真宅悲歡與壽夭貴賤及榮辱人間千般事事了都幻迹脫去無限惱冥冥卧一木向來有生累一毫到不得無論知有無豈不真快適顏淵三十二五十詎是促當季蒙袂者猶不免溝壑榮啓行帶索布褐亦云足且勝楊王孫千季裸爲餽二子守青氈東野應羨福哀哉崔子真去矣奚所憾交情與戚誼宿昔每款曲各恨病冗俱參尋不能數一朝報凶音累月心愴惻窳窳忽有期幽明將永隔臨穴與之訣於情寧有極顧此疲茶久呻吟正負席無由致一哀負負空悲慙

信筆寫哀章感舊淚欲滴君行尚不遠魂在應相識

代書寄沈式汝楷七首

思君幾日結中情纜入衡門眼共明良話未闌翻告別至今心下似懸旌

邇北當時百念生忽看顏色喜還驚邇來兩脚應加健隨意園林放杖行

珍重情書慰我思書中一一說心期工程病後全踈闕感子提撕媿亦隨

仙境元來寫景難陋詩淡媿與人看慙懃續和誠多荷語過情時却未安

朝詩暮禮樂難勝兄弟相將作友朋看取怡怡切切

處休祥令譽一時興魚奉伯仲叔氏

淡谷非關徑沒蓬誦聲偏愛滿山中二連讀禮能無

恙應賴良朋善導功兼懷權哀昆季及聖和賢友

增葺茅齋靜且寬蒲團差勝去冬寒明窓好展寒泉錄安得吾人對案看

青林殤姪女挽

無端珠玉委泥沙生死真同一日花地下若知人世痛定將何語答爺爺

次韻呈素谷先生崑翁時在素谷

曾蒙辱教俾以身家國天下病貧饑亂八箇
題目演成八吟以實市南名齋之義而不敏
遷就迄未有以仰復媿負多矣今敢輒繹平
日見誨之語兼寓區區誦祝之誠每題爲一
篇以請裁訂未知於高意如何

事莫非關命心要不媿天常思毀言語不絕耳傍邊
炳炳前人訓兢兢六十年松楸當此日明發想無眠
右身

有養何愁病無營可樂天心娛理義上意絕利名邊
邵德徵眉壽頤襟享末季區區更祝望加意護餐眠

右病

倫常元本性飲啄孰非天但向危微際要分彼此邊
孝忠傳世世耕鑿趁季季自外人間累惟應付午眠

右家

從者休言病家人莫怨天韶顏華髮下白屋故山邊
婚嫁無餘念墳簾共暮季時來有雞酒倦卽枕肱眠

右貧

一德能臨下斯心可配天孚誠寧有隔感徹本無邊
且使民安堵終看膺過季如何致怨怒丙枕減宸

眠

明齋遺稿 卷二
右國

聖人猶遇早愚叟獨憂天素志存溝壑丹心繫日邊
龍蛇哀赤子賦畝祝豐年願早施仁術令民奠枕眠

右饑

忽忽今何日悠悠欲問天遺民能有子王業定那邊
義有讎千世胡無運百季誰悲永安詔虛破草堂眠

右天下

亂豈終無理人寧久勝天一朝開瑞曜萬里靜妖邊
玉帛歸周日威儀覩漢季人生會見此瞑目可長眠
右亂

寄守道德從兄

聯枕三宵意未傾送兄終日却憂兄雪中醉眼茫然
去能記衡門握手情

聞厚兒醉醒先執弓矢

聞汝持弓我氣增尪孱如父不堪稱男兒有力當如
虎殺賊除讎事始能

送姊行至錦江而別

丙午

朝日初紅霧氣寒亂山西望路漫漫江流豈識人情
苦獨坐沙邊把淚彈

切切吟示子恕

切切怡怡縱異施弟箴兄友亦賢規修爲有關交鞭
策氣質同偏共克治不厭直從心術處何妨頗似戰
爭時看教共到中和地切切怡怡兩得之

次成汝訥

至敏

酬唱韻四言

古云籛金不如一書誰知斯言切而不踈誦君箴戒
能起懦余鬱彼坡丘我祖所閩音容雖遠典刑猶餘
苟墜其緒敢云守廬維山有樵維水有漁維人有學
曷不勉歟但味真腴安慕高車懷哉西歸匪子誰與
樂樂憂憂黃卷是侶寄書山中聊以延佇

哭朴員外

由淵

文

世間榮辱豈關人六十年來好閉門孝友肫肫聞至
性習襟落落見天真當時可惜王師愈他日誰知邵
伯溫不耐清宵對樑月秋風談笑似前晨

次羅顯道

良佐

韻五七言二首

切切停雲句迢迢古漢津自欣文有友誰歎德無隣
病會書中樂閑尋靜裏春他季證心鏡那許着纖塵
閑中思慮病來稀坐見梧桐一葉飛白露欲零芳草
晚黃花將發旅鴻歸光陰似水季空失書冊堆牀志
漸違惆悵良朋千里隔不堪孤詠倚山扉

戲示子恕執中二賢二首

石村氣銳功名上竹里心閑畎畝中休把異同爭得失共修人事聽天公

竹里幽棲招不動石村高興去難停呻吟獨卧梧窓下晴月娟娟却有情

偶成

日暮村村生白烟看來一抹繞山前偶然散步登皋去滿野黃雲慶有季

從弟典籍婦挽

得養何愁病惟良不患貧那知折桂日遽作夢炊人世上無全福人間未了因慙懃契活約聽說亦傷神

酬白文玉

光瑞

丁未

新春一味閉門幽人事多從病後休每覺光陰真似水那堪鬢髮漸成秋簞瓢在昔賢能樂德學當年聖亦憂聞道三餘治半部漫和詩律勉優游

李美叔挽二首

鶴老飢逾響蘭枯死亦馨詩聲傳兩世谷口了平生短筭纔著策寒棲但草亭欲為貞曜謚殊乏斗山名龍西門下士九拙幕中賓友契松寥寺心交二十春方期臨壙訣還媿脫驂人不是無情諛君應恕病貧

洪長遠挽

栗老之甥是上庠坡山仍得敬存方

牛溪先生與洪善應論敬書見

本集

子為先丈鄉稱善孫即吾兄性又良比世沉淪其

奈命如今天椽益堪傷杏壇舊業詩書絕草浦新阡
樹木荒固慮平時多美疹那知此日寫哀章諸兒若
盡同遙集後事猶差勝溧陽

開泰次韓嚮五

伯箕韻

楓爛曾秋賞槐新又夏尋砌苔封夏坼壇草沒仍溪
屈指驚季邁披懷喜友臨歸途諷佳句後約指雙林

青林八章章四句

并小序

青林羨諸賢也山中趣味宿昔心期願言靡

從悵慨交中

束書出門心若澣衣朋儔并轡笑語依依

右出門

山雲藹藹谷樹陰陰溪流泱泱迎我好音

右八山

青山在坐幽鳥悅耳回頭山外杳如千里

周覽庭壇漱濯井泉倦言歸休風來滿樓

右言山中之興

窓牖淨潔几席從容好書對面俗客斷蹤

晨興整冠夕而猶惕我愛君子不素其食

右言山中之趣

南山有豹七日成文北海有魚一擊冲雲

右期望

屈伸有命求舍在我嗟嗟吾友歲不我假

右勸勉

草廬大夫人挽

夫人福履德俱尊在今無聞古罕比母能成子子顯
親爭道三遷未專美 兩朝頻推錫類恩 天賚優
蕃動瞻視豈但榮光大一門坐使 邦家新孝理聰
明康樂到九旬不辨孫曾八十四徽音定入宗正編

夫子餘刑可徵此最是斑衣四老人宛似當年楚萊
子色養榮養奉晨昏膝下怡愉踰六紀扶將左右送
天年篤孝之心知皎矣平生不識母子歡羨歎令人
潛迸淚祇申悲抱和虞殯媿乏鴻詞讚幽懿

家弟推子恕再從弟擇執中從外弟金弘瑞汝
圭執中之妹婿李挺景甫與執中之友金始鳴
聲遠文會于淨水庵以詩勉之 戊申

莫將談謔太悠悠贊似諸君未易求大小有才須有
業好相磨鍊待前頭

諸君今日可謂彥會如恕之清率峭直執之

日齋遺稿卷二
雅飭精緊圭之爽曙超邁若因其德而去其
病則皆可爲有用之器也然年皆已晚矣寧
無遲暮之懼歟每誦陶士行吾方致力中原
不宜過爾優逸之語未嘗不三復而壯其志
疲茶呻吟之中尤不覺起敬於千載深願諸
君之味此語也

翌日諸君各問其病戲答之

堪笑孱生未學醫他人有病豈能知大凡氣質多偏
處明者唯應自省之

尹尚書絳挽

昭祖當時號福翁我公名德遠相同真醇氣宇除邊
襮寬樂平生善始終休道急流爲盛節已知清操激
頽風天心奈不遺斯老士論爭嗟未作公今世古人
那復得善家餘慶自無窮江湖寂寞衣冠遠畱取千
秋史筆鴻

金弟汝圭挽

質圭璋兮材杞梓行孝悌兮心正直外朗朗兮有英
氣內淵淵兮多深識年雖少兮似遠器每相從兮愛
無斃謂能充兮又必達光于家兮顯于國何才命兮
不相謀奄一夕兮就冥漠噫子生兮若止斯誰使子

明齋遺稿卷二
今仁且淑父母老兮妻女穉鮮兄弟兮絕嗣息生者
何辜兮受此冤死而有知兮難瞑目杳神理兮不可
問徒怨毒兮將何益辭庭闈兮去友朋子胡爲兮山
之谷維巖齋兮與淨庵時髮髯兮見顏色秋雲悠悠
兮秋水滔滔嗚呼汝圭兮一去何時復

沈式汝挽三首

子計初來骨亦驚至今何日不吞聲豈知此歲同圭
弟無異當年喪厚兄離索幾嘆難會合簡書空憶勉
功程天寒路遠仍纏病元伯休勞夢巨卿
寒齋積雪照書帷長記吾賢對榻時大意唯欽早自

見沉痾誰料暗相隨生之不永天何戲清者難堅理
亦欺多少心期已冥漠祇應畱與後人悲

鳳飛鳳去幾時迴玉折蘭摧痛不裁顧復恩深長逝
恨填簾情重百年哀塵埋書架心猶炯烟斷孤棲迹
已灰甌獄魯塘遊好地可憐魂氣倘歸來

李大興

惟澤

丈挽

己酉

當時柳谷似藍田吾黨爭推晉伯賢家法自能徵古
範德容應得享高年特恩已賀超毛義至性還嗟
過大連無復平生承款曲野花亭畔愴寒烟

宋伯興挽

憶昨與君初識面希張在左周卿右師門先進數公
等士友趨風唯恐後中間宦學各躡蹻每歎諸賢竟
隄此誰言短期更相促可憐希亾君又爾媿我病螫
無人事匪君踈吾吾自踈生來死去莫一遇往事追
思良可歔平生不識所謂數若培若傾何為者空將
蕭挽寄令弟早晚當哭飛來下

金教官 之白挽

辛亥

嗟君雅望重湖疆清標頎然抑若揚妙歲從師聞大
意中年辭祿卧東岡論交豈必相知早抱病猶思後
會良幽問忽傳驚欲絕不堪蕭挽寄元方

李參判 廷變 令丈挽

歲今行一運公又棄昌辰更起緣何事殷憂匪為身
好賢推雅望無競任天真老至猶勤學官高轉食貧
士林方注屬賢路遽沉堙先子交雖晚平生意最親
停驂出淚久垂札撫孤頻祥日仍聞訃哀懷劇愴神
豈無綿漬酒其奈病纏人尚擬攀珠樹他時問廣津
贈金上舍 萬吉 次其與拱弟韻
多少工夫靜裏宜南山霧豹可能知君家自有書千
卷何用牀頭一局碁

示拱弟

明齋遺稿 卷二
平生願得好林泉一計蹉跎四十季羨子幽棲能辦
此令人欲去更依然

酬朴甥士元

泰輔

用其韻

少壯忽已過撫躬方自傷覽子秋懷作三復感歎長
古人貴立志所性有五常充之苟得道畢竟何可量
非無可觀者小大功相妨徘徊荏苒間日月漸覺忙
願言早從事無爲負季芳

與子恕宿執中所

數嘆嫌猶遠相從喜與偕命燈尋燧局乘月問新齋
少志憐都倦浮生歎有涯朝來還怪爾書架覺塵埋

閔綾州

汝老

文挽

今人誰復古人風樸直平生有此翁苦節持廉知素
履至誠憂國見孤忠溪亭昔日佳篇在遯院當時盛
會同孤露祇今唯血淚不堪蕭挽送吾公

與子敬子恕會淨水庵校仲父童土先生遺稿
十日山中會悽悽歲暮心遺編宜不朽墜緒已難尋
素髮憐垂鬢幽憂耐滿襟平生小宛句明發獨悲吟

宋子文

斗章

挽二首

固知浮世劇悠悠誰料如君亦遽休高識絕人心每
服拙修同道事相謀祇今倚望都歸盡從古才賢不

自由師友書來皆爲慟不堪相送返山丘
百年悲抱向誰傾前事追思淚濕纓素野秋霖扶轄
義交山夜雪叩廬情通宵晤語纔旬浹一紀從遊已
夢驚悽愴空留歲晚約麻湖陳迹似西城

子文大夫人挽

育子恩斯望立揚兒能力學慰阿孃士林正與推賢
友吾黨從知賴義方先逝孝心難瞑目未亾哀怨竟
摧腸承家幸有三孫好託付誠淡懼莫當

哭權弟仁伯

怨

仍展敏叔

慙

墓

江干一宿尚依然苦語中宵淚對懸福反成災將有

命善而蒙禍豈無天悲風落木迷寒谷美質英才杳
九泉惆悵浮生那復計千年骨肉此團圓

浦渚趙文孝公改葬挽

何幸吾生識大賢一團和氣尚依然功存衛道心如
日孝本爲仁行格天正喜明宮開舊寓還驚幽宅改
新阡羈蹤病滯違觀禮宗慕微誠負百季

自迷源東至砥平展伯姑墓而歸宿于龍津渡
邊

迷源役罷向龍門癸卯居然已十年萬事祇今唯血
淚浮生終古但荒原寒風落日淡山裏冷月孤村古

渡邊獨撫行裝眠不得悲吟一夜鬢霜繁

冒雪渡銅雀將趁子文葬期

斜風密雪眼難開病客羸驂暮水隈遙想故人將入地精靈應待巨卿來

曉行

滿衣霜片滿鬚冰觸面寒風曉轉稜忽念平生憂疾戒不堪清血下霑膺

朴尚書 長遠 台文挽

平日家庭每說公真清篤孝古人中官臨冢宰疑寒士詩徹林鳥感 聖衷殄瘁固知時運繫驚嗟應想

野朝同鰈生自有雞綿義却媿微蹤似蟄蟲

閔韓山 晉亮 文挽 壬子

末世吁嗟見古人先君交契若天倫清如寒水元無迹義薄層雲更任真千里海山歸劍佩百季湖月寄精神祇今孤露餘霜鬢蕭挽吟成血滿巾

寄子敬執中二贊

三春欲晚時雨集小窓終日琴書濕我懷良朋遠莫從掩卷時時起佇立古人慷慨多志節進德修業恆汲汲胡為苟偷目前安泛泛嬉嬉狃俗習一朝事到面前時回首茫然悔無及學士身名似轉艱措大工

夫又方急題詩相與勉優游莫謂長作寒蟲螿

送自如督郵金士正 梁 二首 并小序

豆溪居士金君士正老大隱約築園圃治亭
沼有以自適於寬閑之野者似若無求於外
也晚而筮仕得自如督郵行而過余如有得
色余謂以君之才術不為世棄而得展其足
則大而擁旄杖節小猶翱翔州牧何足道哉
而顧反欲以垂老一官為己榮也耶然則其
所以得色於斯者即非國風簡兮之流則殆
不過閑中乘興之一動耳剡溪夜艇豈為戴

安道哉既而馳書送紙求別語遂題二絕以
還之未知君見之以我為得其心裏事也否
耶不以我為非知己者也否耶詩曰

六十年來自在身那將素髮染緇塵故園正值春風
晚無數山花笑却人

寄語山花莫笑人此行非為學趨塵一朝興盡歸來
後依舊當時自在身

示舍弟兼示二姪及婿二首

男長迎婦女迎婿兄家弟家歡相語慈顏喜色獨無
覩悲動中腸淚難禦百季文獻有大業此事唯應付

吾汝願令讀書種子不斷絕世世毋忘保餘緒

古聞養子知親恩今作人翁識翁義當時視作尋常

者歷歷追思皆至意富貴貧賤盡在命唯有學問為

吾事欲將仁智二言勉後生願與相守無相棄

與翁我

詩有家傳忠與孝
聖學智而仁之句

次舍弟韻示可教

翁憐新婿別父喜少兒歸眼裏英英玉階前采采衣
家傳吾欲屬心願爾無違庭岳交培養光輝要發揮

次羅生碩佐送可教韻却寄

聖學階難越人倫道不離賤儒唯守拙狂士豈真癡

原韻有君歸報函文
羅生轉狂癡之句

次朴甥士元送別可教韻

母久未歸子來稀母子相思情孔悲始知人間子母
情不可一日相分離子將迎母母從子嗟我鮮民當
依誰昔我願子聽我願且容母行姑遲遲吾親不在
無所為母雖欲留留幾時哀哀此懷難重訴有時無
聲空淚垂只將餘命恃吾姊晨昏如奉慈顏慈男婚
女嫁且响响望子時來舞彩衣子詩忽投母忽泣默
見真衷皆秉彝念當睽違在不遠終朝不餐還忘飢
嗚呼古來情義有相奪安得此心天遣知使我姊弟

母子幸得偃百年團會無參差

次草丈韻

聖世難焚遇遯章斯文一脉未應亾山林莫道都無事却恐山林事始長

哭李叙仲 百揆

嗟君可謂善人乎惡念平生一點無滿目蕭蕭衰草裏可憐如玉二兒孤

哭尹子度 模

廢宅蓬生徑靈堂草作筵經過空舊約奄忽已重泉兀兀寧嫌陋涼涼不害狷如君未可少吾欲質愚賢

子度與大愚李雲舉不相契故云

隋城泉川路上感舊

班荆昔日此沙邊屈指如今十九年世道日陵耆舊

盡不堪秋鬢已蕭然 歲甲午省外親于安山歷拜浦老於鷗浦歸于高村叔父寓所

時松谷丈罷官歸養適為遯哭金監司弘郁歸機攜壺出奠遂與之偕行分路於此坐而別

畱別安山諸人

舊國迷行徑秋風意自哀今來萬事變此去幾時迴冉冉浮生老棲棲旅思催沉吟到明發欲別更遲徊

贈鄭弟重華

愛爾人如玉悲吾迹似蓬蓬情常款款別意却恩恩

業富貧愈好才通命不窮臨分更相勉刮目對阿蒙

次羅仲輔碩佐韻

方寸工夫要細密一身繩律戒狂踈須知內外互相

養始讀從來賢聖書陰陽聚散無非化世道紛綸莫問誰只合為吾所為

事母忘母助勉孜孜過楊經理碑次和叔韻

摩挲獨賦下泉篇歲月于今八十季猶勝臨安毀新廟道邊無恙立巋然

交山夢子文

故人魂氣遠相隨言笑揚揚似昔時覺後悄然蹤跡滅滿窓霜月淚空知

至坡山宿牛溪書室時纔重修

溪山五世業絃誦百年鄉舊屋猶無恙賢孫乃肯堂詩書瞻滿架童冠儼成行正學今當勉顏亭味卒章

坡山歸路

浪迹還多礙閑行又未能一鞭違勝境三宿誤良朋寶學終難進虛名奈驟登歸興宜急蟄時候已凝冰

與顯道約天磨之遊至坡山顯道如約來會而中丞之命遽下未免輟歸故云

次李彝仲敏叙韻

想抱端憂夜數更感君詩律太淒清當時洛水聞龍
卧幾日岐山見鳳鳴人事屈伸須自得世間榮辱豈
堪驚嚶然更誦箕箒語天意終應在玉成

追次李兄惠仲

敏迪

南謫韻二首

分山爲別墅散策作閑行落照林間入晴波野外橫
樂憂當日志休逸暮年情莫謂全無事終應賴世程

惠兄時來寓交莊與尋仲別業隔一坡金暮齋先生與其弟思齋公扁其齋曰思休思逸

衰職今誰補忠謀古不行同人俱偃蹇異說尚縱橫
豈乏歸田興難忘戀闕情先民有進退綽綽好前程

寄朴季肯

世堂

三首

白屋荒郊外青山學士居前秋一經過此日又何如
想與閑成癖應將世益踈朝朝對蒼壁好展古人書
各辦鄉園計誰懷世道憂君能味淡泊我獨惜優游
會有閑時養方看用處周男兒貴晚節樹立望前頭
道峯曾有約牛浦遽回驂迹蟄煩還怕名浮驟更慙
心期言不盡睽闕悵難堪冉冉時將暮棲棲又向南

讀陶詩戲吟

淵明作楚調悽悽說飢寒以爲身後名於己若浮烟
諒茲無聊語堪笑又堪嘆飢寒非爲名胡乃歸咎然

明齋遺稿 卷二
余亦百世士歲暮獨閉關夕粥亦不給妻孥恆病孱
兒能口詩書衣袖如鵲鴉非無固窮節奈此長艱難
偶爾讀君詩欣然如面論今我亦不述後生將何聞
招任志卿 震昌
癸丑
莫謂今日不學有明日可惜光陰難自留少壯時節
一擲盡老矣悔之將誰尤案頭適有昌黎詩爲爾三
復揚之眾

又示志卿

君來我有故我閑君多病冬宵旣虛負夏日又將竟
媿我學無力憐君氣空橫咫尺阻相攜徘徊發孤詠

寄竹里

此歲已云半明朝是季夏悠悠抱病冗兀兀經晨夜
會合苦難就襟懷何由瀉餒猶在耕中實不副名下
天運又如此將安知稅駕

李晦卿挽二首

計與書俱至驚吁淚不禁今人誰古貌末俗少真心
孤露霜生鬢幽憂病滿襟無因一相哭聊復寄哀吟
小窩聯榻日永夜耐寒時緼斃身猶胖齡頽志未衰
雙泉飢自樂一節老仍奇可惜古靈薦空留身後知

崔執義

攸之

丈挽

子今耆舊似星稀夫子如何又遽歸
邃學可徵爐火說高才聊寓竹園機
丘園獨保幽貞吉貝錦誰嗟世道非
惆悵江潭前夜晤病慵終負再摳衣

七夕

新月纖纖夜始清卧看河漢更分明
病來身檢全踈放朝夕相觀媿後生

送舍弟子恕歸掃交瑩

欲及中秋拜兩親虛名實病奈纏人
送君獨向西歸路佇立山坡淚落頻

奉次滄江金檀丈送菊韻三首

青賤詩句白盆花萬鎰黃金未足過
花在窓前詩在壁清芬斗覺滿吾家

數株垂柳一階花秋月春風恁地過
莫怪世人全忘却紅塵難到老仙家

霜後誰開冷淡花繁華時節眼前過
平生愛誦濂翁語欲把寒香比自家

執中又送菊和詩來又步成三絕

滄江分寄一盆花廣石添移才本過
老圃花階栽得遍剩將顏色借吾家

傍人不解愛寒花爭道鋪張語太過
如此若無閑活

計定應埋沒老田家

朝憐暮愛數叢花心下懂懂未放過却恐主翁多廢事不無長笑大方家

滄江丈又著黃白紅三菊說見貽以白自况黃屬於余紅屬於子敬又用前韻爲一絕分韻用白字爲一絕要和謹又以一絕奉酬前韻又依分韻賦黃字一絕而並賦白紅各一絕

好是凌霜一樣花世間常苦品題過休將形色分同異且看交開繞我家

從他佳節迫重陽不耐天時已履霜多荷詩翁珍重

語僞淵終媿對眞黃

偶尋三逕秋八園驚起西湖一隻鶴坐久襟懷覺爽然向來堪笑論玄白

牢落功名一秃翁天官員外壯元公未乾屋壁催西上去踏東華十丈紅

贈羅仲輔

朝披赤城雲暮玩白江月翩然過陋巷襟袖清風發媿我獨抱病雙鬢飄霜髮何由從子遊倚枕空嗟咄知子有高志愛子非凡骨正好讀書時詎合他事汨願言促迴駕身心得安歇自掃一室靜寒宵坐兀兀

從古聖賢訓一一不可闕真源苟不充溝澮盈還渴
少季儘須臾初心易埋沒臨分無所贈此言君莫忽
用前秋酬唱韻送挽惠仲外兄

天既窮賢路人誰免此行初聞心似墜久憶涕空橫
暮歲參同計前秋聚散情羈蹤阻一哭積雪滿江程

宗會于淨寺二首

泣血當年未死身還從此地講親親淡知述事能爲
孝只恐微誠未及人

百年丘木奄傾摧家運空悲盛後衰唯有心傳應未
墜後生無忘重栽培

高祖考墓右有老栢一株大數圍分爲五六
幹上有連理枝柯葉干雲乃曾祖考所手植
也歲己酉夏忽無風自拔仆地而自戊申至
壬子五年之間諸父府君相繼棄世實若非
偶然者故特識之且屬宗孫使之更植云

金生益泰挽

甲寅

育子望才才望成人間父母皆同情力學揚名以顯
親孝子至誠期必伸居然百計摠墮空天乎命乎何
矇矇季少空齋百季志老翁哀腸寸斷死嗟余閱人
亦豈鮮愛子相期殊不淺蕭章送爾父子魂哀哉已

明齋遺稿卷二
矣竟何言哀哉已矣竟何言

酬楊遠子

道南

秀才三首

君子將心比鏡明由來不許一塵嬰須知喫緊工夫
在坐想源頭便是迎

當從下學實加功口耳悠悠大脫空更識聖賢皆有
指名言雖異實還同

爲學要須習耐煩心真力久自逢源滔滔世俗奔趨
裏獨賞吾賢早得門

次陶責子韻

偶教兒此
詩有感

禿髮不愁白衰肌難望實聰減已忘書眼眇艱試筆

窮簷誰與伴兩兒聊成匹豈無期願情終踈教養術
宵雅僅肄三大火已流七從今戒優游與爾共祇栗
老少俛孜孜成已仍成物

龍西叔母挽詞

乙卯

昔我先生道窮厄在家蕭然常似客自得夫人主中
饋半世不復憂朝夕夫人有才人共知夫人有德世
尤稀兒孫穰穰看滿膝見者無能辨已出方期壽祿
晚景享會有白眉期榮養一夜慈顏作永訣靜樹淡
悲那忍說平生亦抱蓼莪痛拜寫哀詞淚垂血慙慙
厚意已難追却憶堂前起居時

李畱守 從山 挽

諸父親知盡後先向來夫子獨歸然年尊眼見曾玄
盛德厚身膺福祿全忍說悲風號樹下翻思昔日拜
牀前祇今病螫無人事泣寫哀詞報大連

贈別朴錫士元

旅鴈號霜空秋風正慄慄呻吟伴二豎寂寞閉一室
之子忽來訪頭角轉窗翠連宵得晤語頓令幽憂失
看書已無難箋註能爬櫛間論西山經欲屈篁墩膝
昨過右海堧有作奚囊溢為我寫齋扁古篆不停筆
賢哉富學藝美矣妙才質為道不遠人八聖豈無術

進取貴立志根基在務實願言更勉旃明誠期異日
名利不足慕世禍非所怵南君儘端良林子亦超逸
且敦切德義彬彬好儔匹嗟余一無成可憐奄衰疾
安得挽子畱窮簷共殘帙雖如老牛倦庶以賴鞭扶
臨分却悵然有懷為君述

酉峯新居次姪輩韻二首

丙辰

何事棲棲又卜居可嗟衰髮已蕭疎孤懷獨抱屏山
劍舊業空慙馬服書自判殘生同螫燕非關亂世歎
潛魚即今爾輩無餘望分內功程且勿虛
十載徒然恨各居一旬一見亦為踈如今好結山中

社有味同看老後書每愛魏賢吟伐輻曾嫌韓子訖
懸魚餘生即此相爲命身外悠悠萬事虛

定山途旅別朴和叔

離索年來媿病慵相看空復歎衰容學難得力尤誰
責事易成乖悔莫從當世子能堪任道自今吾欲益
藏蹤恩恩歧路還南北說話終然未豁胸

往長鬻行三日宿秋風驛

細雨行人濕秋風驛路窮谷平川似倒山斷嶺還通
但使誠能感何憂理未公悠悠扶病骨無與話心中
訪玉山書院謁晦齋先生祠有感

紫玉山中訪古祠洗心臺上獨躡躑千秋遺恨無人
問吾道如何又至斯

過金烏山有懷冶隱

冶隱高風百世垂牛山何事強吹疵父子一家還二
事至今猶使後人疑

與和叔論
此故及之

冶隱送子就仕曰以吾事高麗
之心事爾朝鮮云此却可疑

留題永山舊館二首 并序

歲丁丑春我祖考吏部府君以斥和謫于茲
土是年冬放還田里余兒時實侍膝下今適
四十季矣路出邑底爲尋舊館則主翁金貴

漢季八十六尚無恙問知爲余悲喜不勝爲之慙慙說舊苦請留宿其見敬愛出於至誠余行意甚忙而感其誠意爲之一宿竊念祖考來此僅一季而去余亦今以蓬累行色偶爾經過揆以常情似不至此於是喟然知我祖考之厚德淡仁入於人心者至今人沒世不忘後之人安可不知其所以然而思所以保守餘慶也哉主翁之子名尚立其時亦以童子竹馬相從云而余與渠俱不能省記矣於其別也爲題二絕留與之

舊迹熹微似夢中
幡幡獨有主人翁
慙慙爲說當時事
聽罷無言淚滿瞳
屈指如今四十秋
當時童子雪盈頭
如非款款淡情見
安得行人盡日留

贈孫季昌

並序

季昌卽永吏也聞余爲尼山之客也來見之言渠爲貢生時以主倅命守廳於祖考寓所其時負余兄弟而遊能道余兄弟兒時名且問爲伯歟季歟其驚喜之色可掬余媿其厚情題二十字以爲別其時主倅卽鄭公援也

吾何識爾面爾乃記吾名相見復相別依然空有情
校朴甥士元投壺儀題其後以還

藝游功在四樂節益稱三古道要非俗敦行却勝談
儀當頻檢束理好細尋揆自歎無人伴衰頽卧草庵

酬南子聞

鶴鳴

一旬書再至空踈媿繾綣清詩况起余吟諷忘朝飯
美哉立此志棄末欲趨本看君始生鬚豈云年歲晚
撒手向前去無憂道悠遠他時願借光此語由衷悃

送養一

堂姪敬教

赴水城任五首

少小同游學如今各老蒼子登官屢踏吾蟄病仍纏

萬事都休說初心兩莫償惟應勉歲暮先業戒終荒
既得諍臣名仍兼循吏聲立身能不苟如子實難輕
事業猶多在男兒肯小成願從黃卷裏益閱古人程
楊稱財酒色呂訓慎勤清財酒豈為慮慎勤當着行
公私幾猛省禍福際安貞報國無他道貽親有令名
幽憂方掩戶別意更盈襟動靜雖殊迹身心要共箴
見明能樹立剛克免浮沉世道難容力中宵獨費吟
憶昔烏川老慙慙避地謀襄陽五色好太白奧原幽
衰病已如許存亡今幾秋憑君欲更問時事日虞憂

金措大

枕挽

風標奕奕弟兄間海曲幽棲似伯鸞有酒樽中貧也
樂無營世上老因閑浮榮豈必吾身享餘慶應從後
嗣看最是秋江斷行鴈不堪孤影獨飛還

敬中內子挽

平生長憶敬中賢一隔明幽已十年未見螟兒傳後
事空聞龍劍會重泉桑林故宅飛秋葉槐里新阡鎖
暮烟薤露歌中丹旆去蕭條應有路人憐

喜江叔移入新居居近西澗從今以澗易江可
也

男負妻攜入谷中生涯落落坐談空人皆笑我三貧

里我欲呼君四耐翁

安慶昌產盛松都庶人也性好
善聞善人之名則不遠千里而

往從之非其義一芥不取自
號四耐謂耐困飢寒暑也

叔入新居三日產得一女戲賦之

青松繞屋不須籬樵汲都兼一小嫖蝸室却嫌無長

物夜來添得莫愁兒

昔盧家女各莫愁貧女至三尾
楊蒲隅而叔忻狀無愁色真可

謂莫
愁也

尹晉州衡聖合丈挽

幾季流落卧江湖晚歲官聯下大夫未覺秋容羞老
圃肯將蘭佩混泥塗兒孫挺列人生福耆舊凋零世
事吁他日不堪尋故墅松筠滿壑主翁無

西澗得一書名天機大要請題目為書二絕於其面二首

一端誰遣露天機幻出人間伎倆奇堪笑箇中些子事都將禍福動驚之
借問何從得此來枉勞心眼事堪哈不如且讀雲臺記魯戶周門次第開

澗叔新差忠順衛自官追去感而賦之

他田皆稔我還饑冰至猶穿短袂衣抵死不曾寒乞樣一心徒欲古賢希四民職分如皆得五衛申明未必非咄咄窮人無可告為君終夕倚窓扉

同春先生衣履之藏將自燕歧遷返于懷川拯病不能赴執紼之役謹綴蕪語用備邊蕭之禮

庶以少伸區區之衷曲云二首

易簣于今已五暮德音長使士林思平生禍福初非計吾道存亡自係時一片有丹天日照九原誰白
聖明知銘旌七尺雙雲綵觀者何人不淚垂
一語丁寧尚在中由來義重即情隆不堪世事多翻覆難得人心保始終方寸故應千載識物論須待百年公蕭歌一曲哀於哭自悼微蹤似蟄蟲

題李子貞師吉素屏八絕

明齋遺稿 卷二
心知慕善與人忠款款頗聞好義風但恨向來書少
讀自今須勉困知功
對冊休嫌舌本強潛心默玩味還長七年病蓄三季
艾猶勝終身只面墻
貌容辭氣德之符君子於焉辨哲愚言若不能行必
重願君加意着工夫
外物毋要太點裝點裝皆好己心荒吾儕欲守儒家
法習俗先除一副當
營營橫目役吾心曾見前賢比獸禽會向此間真警
惕超然方有好胷襟

無心飲食聖猶難百事惟勤後可觀堪歎世間悠泛
者居家還復懶衣冠
聞賢希聖士希賢人一能之我則千日用無非爲學
事清晨盥櫛夜深眠
古人遺訓在書中刺說閑辭儘脫空今日與君成一
誓他時毋負此屏風

子貞以素質求得好言語可以常目者余以
牛溪先生所戒人皆喜聞新語而以舊聞爲
陳言者爲辭旣而子貞固要之不可拒仍思
有諷詠者能感發遂綴聖賢教人之訓爲八

絕使舍弟子恕書以贈之苟子貞不能受用
則吾兄弟與子貞當共被表襮之責於先生
矣子貞其念之哉柔兆執徐大雪節日酉峯
病夫識

明齋先生遺稿卷之二

